

CHL 2720.1132

21  
5


CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE

SEP 20 1932

明史道崇列傳第一百八十七至一百八十九

雲南土司一二三

95



明史藁

列傳第一百八十七

光祿大夫

經筵講官明史總裁戶部尚書加七級

臣王鴻緒奉

敕編撰

哈佛大學  
圖書館  
珍藏印

雲南土司一

雲南

大理

臨安

楚雄

潞江

景東

廣南

廣西

鎮沅

永寧

順寧

蒙化

孟良

孟定

耿馬安撫司

曲靖

雲南滇國也漢武帝時始置益州郡蜀漢置雲南郡隋置昆  
州唐仍之後為南詔蒙氏所據改鄯闡府歷鄭趙楊三氏至

大理段氏以高智昇領鄯闡牧遂世其地元初置鄯闡萬戶  
府既改置中慶路封子忽哥爲雲南王鎮之仍錄段氏子孫  
守其土忽哥死其子嗣封爲梁王洪武六年遣翰林待制王  
禕等齎詔諭梁王久留不遣卒遇害八年復遣湖廣行省參  
政吳雲往中途爲梁使所害亦未達十四年征南將軍傅友  
德藍玉沐英率師至雲南城梁王赴滇池死定其地改中慶  
路爲雲南府置雲南都指揮使司命都督僉事馮誠署司事  
二月詔諭雲南諸部蠻十五年友德等分兵攻諸蠻寨之未  
服者雲南城守者少諸蠻相煽爲叛謀有土官楊苴尤桀黠  
給其下言雲南城可取集蠻衆二十餘萬來攻時城中食少  
士卒多病寇至都督謝熊馮誠等嬰城固守賊不能攻遂遠

營爲困城計時英等方駐師烏撒聞之選驍騎還救至曲靖  
遣卒潛入報城中爲賊所得詰之曰總兵官領三十萬衆至  
矣賊衆驚愕遂拔營宵遁走安寧羅次邵甸富民普寧大理  
江川等處復據險樹柵謀再寇英分調將士皆勦降之斬首  
六萬餘級生擒四千餘人諸部悉定二十六年正月黔寧王  
沐英薨命其子春襲封西平侯往鎮雲南自英平雲南在鎮  
十年恩威結於蠻徼太祖遂命之世鎮滇人皆嚴憚之如朝  
廷每下片楮諸番部具威儀出郭叩迎盥而後啓曰此令旨  
也沐氏亦皆能以功名世其家每大征伐輒以征南將軍印  
授之沐氏未嘗不在行間數傳而西平裔孫當襲侯守臣爭  
之謂滇人知有黔國公不知西平侯也孝宗以爲然許之自

是遂以公爵佩印爲故事而諸土司之進止予奪亦皆咨稟焉及承平久文網周密凡事必與太監撫按三司會議而後行動多掣肘土官子孫承襲有積至二三十年不得職者土官謂上官不足憑恃亦復慢令玩法無所忌憚待其罪大惡極然後興兵征勦以致軍民日困地方日壞於是大學士楊一清等因武定安銓之亂痛切陳之黔國公沐紹勳亦以爲言雖得旨允行然積習已成亦不能遽爲更革馴至神宗之世朝廷惰媮封疆敗壞日甚一日至緬莽之叛皆土官之失職者導之雖稍奏膚功而滇南喪敗卒由於土官沙定洲之手沙定洲者王弄山長官司沙源之子也沙源驍勇有將材萬曆中數從征調有功巡撫初委以王弄副長官事繼以征

建水功乃以安南長官司廢地界之後征東川征水西及馬龍山之戰全雲南會城稱首功源遂累加至宣撫使時號沙兵定洲其仲子也崇禎中元謀士知州吾必平欲謀殺官沐天波勦之調定洲從征定洲不欲行出怨言會好徒饒希之余錫朋者通天波全無以償錫朋常出入土司家誇黔府富盛定洲心動陰結都司阮韻嘉諸人爲內應既定洲入城辭行天波以家諱日不視事定洲謀而入焚劫其府天波聞變由小竇遁時寧州祿永命在城方巷戰拒賊從官周鼎止天波留討賊天波疑鼎爲定洲誘也殺之其母妻皆走城北自焚死定洲據黔府盤踞會城劫巡撫吳兆元使題請代天波鎮滇傳檄州縣全滇震動祿永命與石屏州龍在田俱引所

部去定洲遂引衆追天波至楚雄時楚雄爲必奎所破金滄  
副使楊畏知奉調至楚雄留之畏知謂天波曰公何不西走  
永昌使楚得爲備而公在彼犄角首尾牽制之上策也天波  
從之定洲至楚雄城閉不得入乃去遣其黨王翔李日芳等  
攻大理蒙化俱陷畏知乘間檄城外居民盡入城築陴濬隍  
調土漢兵守之定洲聞祿永命各固守不敢至永昌恐畏知  
截其歸路急還兵攻楚雄不下值畏知坐城樓賊發巨礮擊  
之煙焰籠城櫓衆謂畏知已死而畏知端坐自如賊相驚謂  
神畏知伺賊間輒出奇兵殺賊甚多賊引去攻石屏不下還  
攻寧州祿永命戰死賊計進東稍稍定乃復攻楚雄分兵爲  
七十二營統以大營一環城掘濠爲久困計會張獻忠死其

部衆孫可望率殘兵由遵義入黔稱黔國焦夫人弟來復仇  
民久困沙兵喜其來迎之定洲解楚雄圍去禦於草泥關大  
敗遁歸阿迷可望破曲靖及交水俱屠之遂由陸涼宜良入  
雲南城分遣李定國徇迤東諸府而可望自率兵西出畏知  
禦於啓明橋兵敗被執可望聞其名不殺語之曰吾與爾共  
討賊何如畏知要以三事不用獻忠僞號不殺百姓不擄婦  
女吾從爾可望皆許之卽折箭對誓乃以書諭天波如畏知  
言天波亦來歸而李定國之徇臨安者定洲部目李阿楚挑  
戰甚力定國穴地置礮礮發城陷屠之殺城中官民於城外  
白場合七萬八千餘人斬獲不與焉當時皆意定國破臨安  
必襲阿迷取定洲乃僅掠臨安子女而回所過無不屠滅於

是迤西以畏知在軍得保全而迤東之殺與獻忠同慘始定洲歸屯兵洱革龍且借安南援自固會可望與定國不協聲其罪杖之百而責以取定洲自贖定國既至定洲士目楊嘉者方迎定洲就其營宴定國偵得之率兵圍營相拒數日乃出降遂械定洲及其妻萬氏數百人回雲南剝其皮市中可望遂據滇而天波卒走死於緬甸

大理唐葉榆縣境也麟德初置姚州都督府開元末蒙詔皮羅閣建都於此爲南詔治太和城至閣羅鳳號大蒙國又至異牟尋改大禮國其後鄭買賜趙善政楊干貞互篡奪至五代晉時段思平得之更號大理國元憲宗取雲南至大理段智興降附乃設都元帥封智興爲摩訶羅嶺管領八方又以

劉時中爲宣撫使同智興安輯其民段氏有大理傳十代至寶聞太祖開基江南道其叔段真由會川入京奉表歸款洪武十四年征南將軍傅友德克雲南授段明爲宣慰使明遣都使張元亨貽征南將軍書曰大理乃唐交綏之外國鄰國實宋齊畫之餘邦難列營屯徒勞兵甲請依唐宋故事寬我蒙段奉正朔佩華篆比年一小貢三年一大貢友德怒辱其使明再上書曰漢武習戰僅置益州元祖親征祇緣鄯闐乞冀班師友德乃荅書曰大明龍飛淮甸混一區宇陋漢唐之小智卑宋元之淺圖大兵所至神龍助陣天地應符汝段氏接武蒙氏運已絕於元世寬命延息以至於今我師已殲梁王報汝世仇不降何待十五年正月征南左將軍藍玉右將

軍沐英遂率師攻大理大理城倚點蒼山西臨洱河爲固段世聞王師至聚衆扼下關以守下關者南詔皮羅閣所築龍尾關也號險要王等至品甸遣定遠侯王弼以兵由洱水東趨上關爲犄角勢自率衆抵下關進攻具遣都督胡海洋由石門間道夜渡河繞出點蒼山後攀木援崖而上立旗幟昧爽軍抵下關者望見皆踴躍譟蠻衆驚亂英身先士卒策馬渡河水沒馬腰將士隨之遂斬關入蠻兵潰拔其城段世就擒世與明皆段寶子也至金陵帝傳諭曰爾父寶曾有降表朕不忍廢賜長子名歸仁授永昌衛鎮撫次子名歸義授鴈門鎮撫大理悉定因改大理路爲大理府置大理衛指揮使司十六年五月品甸土酋杜惠來朝命爲千夫長命六安

侯王志安慶侯仇成鳳翔侯張龍督兵往雲南品甸繕城池立屯堡置郵傳安輯其人民十七年以土官阿達爲鄧州州知州阿散爲太和府正千夫長李朱爲副千夫長楊奴爲雲南縣丞十九年置雲南洱海衛指揮使司以賴鎮爲指揮僉事洱海本品甸也經兵燹餘人民流囚室廬無復存者鎮至復城池建譙樓創廬舍分市里立屯堡築隄防嚴斥堠又開白鹽井民始安輯二十年八月詔景川侯曹震及四川都指揮使司選精兵二萬五千人給軍器農具卽雲南品甸之地屯種以俟征討永樂十八年雲南縣土官縣丞楊得闕來朝貢馬賜鈔幣宣德六年浪穹縣故土官典史王保子寧等來朝貢馬及方物八年十二關巡檢司土官鄧州州把事何懋

巡檢張護來朝貢馬正德二年鄧川州土知州阿驥遣人貢象四賜驥及其妻綺幣有差嘉靖元年改十二關長官司於一泡江之西從雲南巡撫何孟春奏也

臨安古句町國漢置縣唐爲羈縻荊州地天寶末南詔蒙氏於此置通海郡元時內附置阿剌部萬戶至元中改臨安路屬臨安廣西元江等處宣慰司洪武十四年征南將軍下雲南遣宣德侯金朝興分道取臨安元右丞元卜台元帥完者都及土官楊政降革臨安宣慰司置臨安府及臨安衛指揮使司十七年以土官和寧爲阿迷州知州弄甥爲寧州知州陸羨爲蒙自知縣普少爲納婁茶甸副長官俱來朝貢因給誥敕冠帶以命之十八年臨安府千戶納速丁等來朝人賜

米十石永樂九年溪處甸長官司副長官自恩來朝貢馬及金銀器皿賜賚有差自恩因言本司歲納海肥七萬九千八百索非土所產乞准鈔銀爲便戶部以洪武中定額難准折輸帝曰取有於無適以厲民況彼遠夷尤當寬恤其除之宣德五年中官雲仙還自雲南言東山地地方衝要夷獠販鬻多經於此邇因蠻寇爲患暫遣營長普覺往來巡捕非經久計諸夷皆請置巡檢司於東山口并請以普覺爲巡檢從之八年虧容甸長官司奏河底自洪武中官置渡船以濟往來路通車里八百近年軍民有逃逸出境詐稱使者追令乘載往往被害又沿河時有劫盜出沒蠻民不安乞置巡檢司以故把事袁凱之子瑀爲巡檢從之十年寧州土官祿慶來朝貢



馬賜綵幣嘉靖元年復設臨安府寧州流官知州州故有土官知州職專巡捕州事則流官知州掌之正德初土官祿俸陰賄劉瑾罷流官遂交通彌勒州十八寨強賊爲害捕獲誅之其子祿世爵復以罪論死撫按因請罷襲土官仍設流官吏部議覆從之初臨安阿迷州土官普柱洪武中爲土知州後設流錄其後覺爲東山土巡檢旣而以他事廢正德二年以廣西維摩王弄山與阿迷接壤盜出沒仍令普覺後納繼前職給以冠帶至普維藩與寧州祿氏構兵師殲焉維藩子名聲幼兵備道收畜於城中令郡諸生教之學旣長召諸寨長共立之名聲收拾舊部勇於攻戰從討奢安有功仍授土知州漸驕恣崇禎五年御史趙洪範按部名聲不出迎已出

戈甲旗幟列數里洪範大怒謀之巡撫王伉列奏請討貴州總兵高士傑布政周士昌擊敗之進圍州城名聲恐使人約降而陰以重賄求援於元謀土知州吾必奎許之時官軍已調必奎隨征必奎與名聲戰兵始合佯敗走官軍望見遂大潰士昌戰死朝廷罪巡撫起繫逮之而名聲就撫然驕恣益甚廣西知府張繼孟到官欲圖之陽言名聲人傑可大用當事者不宜過疑激之使變名聲聞則大喜伺繼孟謁副使赴臨安陰遣人候道上繼孟亦預戒從吏至阿迷當過知州比至州城繼孟假熟寐徑行醒則已逾城十餘里忽怒榜輿人促駕返而嚴趣驛騎相待獨以數騎回阿迷名聲已聞繼孟言及相見大喜跪起迎坐甚恭方進茶繼孟謂曰聞公善毒

人有諸名聲起曰公何忽出此言遽從繼孟手易其甌一飲盡繼孟起告別留之不可曰兵使期不可緩俟還從公飲未晚也遂疾馳凡三易馬至臨安而追騎幾及俄入城免繼孟別後名聲卽死蓋易甌時繼孟已傳毒匙間而名聲不知也必奎聞名聲死遂反陷武定祿豐楚雄諸州縣時寧州土知州祿永命石屏州土目龍在田者俱與必奎名聲從征著名至是黔國公沐大波檄之統土兵合勦擒必奎名聲妻萬氏本江西寄籍女淫而狡名聲死後改嫁王弄山副長官沙源子定洲名聲有子曰服遠與萬氏分寨居定洲誘殺服遠併其地旣天波檄定洲取必奎定洲不欲行叛詳雲南府土司傳臨安領州四縣四其長官司有九曰納樓茶甸曰教化三

部曰溪處甸曰左能寨曰王弄山曰虧容甸曰思陀甸曰落恐甸曰安南其地皆在郡東南西平侯征安南取道於此蓮花灘之外卽交荒外而臨安無南面之虞者以諸甸爲之備也但地多瘴流官不欲入諸長官亦不請代襲自相冠帶日尋干戈爲廣南沙儂竊據幾爲所併納樓部內有礦場三曰中場鷺黃摩訶封閉已久亾命多竊取之其安南長官司本阿剌蠻所居舊名褒古後名捨資元爲捨資千戶所以地近交趾改安南道屬臨安路正德八年蒙自土舍祿祥爭襲父職鳩殺其嫡兄祿仁而安南長官司土舍那代助之以兵遂稱亂守臣討平之事聞帝命革蒙自土官改安南長官司爲新安守禦千戶所調臨安衛中所官軍戍之

楚雄昔爲威楚元憲宗置威楚萬戶府至元後置威楚開南路宣撫司洪武十五年征南將軍遣南雄侯趙庸取其地十七年以土官高政爲楚雄府同知阿魯爲定邊縣丞四月土蠻阿里遣把事及子弟來朝詔賜綺帛有差永樂元年七月楚雄府言所屬蠻民不知禮義惟焚種賦性溫良有讀書識字者府州已嘗設學教養其縣學未設今楚雄縣所轄六里而焚人過半請立學置官訓誨從之宣德五年命已故土官知府高政女襲本府同知政初爲同知永樂中來朝時仁宗監國嘉其勤誠特陞知府仍命子孫世襲同知政卒無子妻承襲又卒其女奏乞襲知府帝曰皇考有成命令襲同知八年陞南安州琅井土官巡檢李保爲本州判官以南安州鄉

老言本州俱是羅舞和泥烏蠻雜類稟性頑獷因無土官管束多致流移差役賦稅俱難理辦近因本州缺官衆推保署州事撫綏得宜民皆向服流移復歸乞陞本州土官吏部言南安舊無土官難從其請帝以守舊因善然爲治亦在順民情遂以保爲土官判官九年女土官同知高冬梅遣姪貴來朝貢賜予如例黔國公沐晟等奏楚雄府黑石江及泥坎村銀場軍民盜礦千百爲羣各執兵攘奪又楚雄縣賊首者些等糾合武定賊者惟等劫掠軍民殺死巡檢張禎又定邊縣阿苴里等處強賊持兵抄掠景東等衛又大理蒙化楚雄姚州皆有盜出沒帝敕責晟等期以三月計靖諸爲亂者正統二年南安州土判官李保及其妻王氏來朝貢馬及方物賜

宴并綵幣衣履嘉靖四十三年彝羅叛蠻阿方等兵起先攻  
易門所流劫囉峨昆陽新化又彝羅僭號稱王約土官王  
心王行道爲援一心後悔詣軍門請討賊自効巡撫呂光洵  
許之尋招降其黨數百人督土漢兵分道俱進先擒向陽乘  
勝攻大小木址二寨克之斬阿方首餘黨悉平

激江唐爲南寧昆二州地天寶末沒於蠻號羅伽甸宋時大  
理段氏號羅伽部元置羅伽萬戶府至元改激江路洪武十  
五年雲南平激江來歸附因改激江府永樂八年路南州把  
事楊惠來朝貢馬激江居雲南之中山川明秀蠶衣耕食民  
安於富近郡之獯獯性雖頑很然敬其長上土官至爭迎到  
家割羊擊豕罄所有以供之婦女皆出羅拜務取其懽心故

於雲南諸府獨號安靜云

景東古柘南也漢尚未有其地唐南詔蒙氏始置銀生府後  
爲金齒白蠻所侵奪元中統三年討平之遂以所部隸威楚  
萬戶至元中置開南州隸威楚路洪武十五年平雲南景東  
先歸附土官俄陶獻馬百六十四匹銀三千一百兩馴象二詔  
置景東府以俄陶知府事賜以文綺襲衣十七年命俄陶爲  
景東知府十八年俄陶遣其弟阿你奉表貢方物詔賜阿你  
鈔錠是年百夷思倫發叛率衆十餘萬攻景東之北吉寨俄  
陶領衆擊之爲所敗率其民千餘家避於大理府之白崖川  
事聞帝嘉其忠特遣通政司經歷楊大用齎白金文綺賜之  
二十三年沐英討平思倫發復景東地因奏景東百夷要衝

宜置衛以錦衣衛指揮僉事胡常守之俄陶仍舊職二十四  
年帝以景東爲雲南要害且多腴田調白崖川軍士屯守二  
十六年二月命洱海衛指揮同知賴鎮守景東從沐春請也  
三十年四月命故知府俄陶之子幹襲父職永樂十年陶  
遣人貢馬賜鈔幣有差宣德五年六月置孟緬長官司時景  
東府奏所轄孟緬孟梳地方遐遠屢被外寇侵擾乞并之  
於孟緬設長官司授把事姜嵩爲長官以隸景東歲增  
五十兩六年大候州土官知州刀奉漢奪景東知府陶瓚所  
管孟緬之地救黔國公沐晟遣官撫諭正統中思任發叛景  
東地多爲所侵知府陶瓚征麓川有功進階大中大夫資治  
少尹其祖母阿疑封太淑人弘治十五年景東衛自正月十

九日後雲霧黑暗不辨人形晝夜不別者凡七日巡撫陳金  
以聞命廷臣議考察以謝天變時南京刑部僉都御史樊瑩  
承旨考黜文武官千二百員嘉靖中景東土舍陶金以罪未  
襲會者東甸構兵奪其印去金以兵取之斬其頭目刀儀得  
印以歸景東部皆變種性淳樸習弩射以象戰歷討鐵索米  
魯那鑑安銓鳳繼祖諸役皆發其兵及戰象天啓六年貴州  
叛寇安邦彥安效良率衆號二十萬至馬龍後山去會城十  
五里總兵官遣景東土舍陶明卿率兵伏左路賊恃衆分八  
路衝至官軍按兵待之賊來逆擊死戰不退明卿乃以象陣  
從左翼衝出橫擊賊驚潰追逐十餘里巡撫上功推明卿第  
一景東每調兵二千必自効千餘餉士之費未嘗仰給公家

於土司中最稱恭順其府治東有邦泰山險甚土官陶姓之所世居也

廣南宋時名特磨道儂智高之裔居之元至元間立廣南西道宣撫司領路城等五州後來安路奪其路城上林羅佐三州惟領安寧及富二州洪武十七年歸附革故元廣西路宣撫司置廣南府以土官儂郎金為同知十八年郎金來朝賜錦綺鈔錠有差二十八年都指揮同知王俊奉命領雲南後衛官軍至廣南築城建衛土官儂貞佑不自安因結羣蠻據山寨拒守俊遣人招之負固不服輒伏蠻兵草莽中劫掠覘官軍進退俊乃遣指揮歐慶等分兵攻各寨自將取貞佑又以兵扼間道絕其救援於是諸寨悉破敗衆潰貞佑窮促就

擒械送京師以其子儂郎金授廣南府通判永樂六年七月廣南府富州土官知州沈絃經至京朝貢值仁孝皇后喪絃經奉香幣致祭宣德元年土官儂郎舉來朝貢馬正統六年廣南賊阿羅阿思等劫掠命總兵官沐昂等招撫之先富州聽襲知州沈政奏郎舉集兵欲滅富州至是郎舉奏政糾賊衆侵占廣南地方勅昂等體勘七年昂等奏二人叛逆無實迹因有隙互妄奏兵部請治政等罪帝以蠻人宥之政舉相仇殺已十餘年時方征麓川憚兵威不敢動未幾郎舉以征麓川功陞同知死無嗣四門族舍兵日威推儂文舉冠帶署事屢立戰功萬曆七年實授同知子應祖從官兵征三鄉親獲叛首阿機魯阿則詔賞銀百兩征播徵其兵三千授之職

討尋甸叛目獲大禮保楊禮賜四品服儂氏自文舉藉四門舍目之力得授職後儂氏替襲必因之土官之政出於四門租稅僅取十之一焉道險瘴知府不至其地州印以臨安指揮一人署之指揮出印塵封一室入取必有瘟癘死亡萬曆末知府廖鉉者避瘴臨安以府印付土同知儂仕英子添壽護之添壽死家奴竊印并經歷司印以逃既而歸印於其族叔儂仕祥所時仕英親弟仕儂例得襲追仕祥印仕祥不與遂獻地與泗城州土官岑接與連婚構兵滅仕儂家亡何仕祥亦死其子琳乃以府印送接而經歷司印則琳弟瓊攫有之巡撫王懋中調兵往問瓊懼還印於通判周憲而接亦出府印獻於官時兵方調至境遽遣歸廷議治鉉擅離與守巡

失檢之罪至瓊接抗命已輸服姑勿問詔可未幾儂紹湯兄弟爭襲各糾交阻兵象入郡焚掠一空

廣西隋屬牂州後爲東蠻烏蠻等部所居唐隸黔州都督府後師宗彌勒二部凌盛蒙段皆莫能制元憲宗七年始內附至元十二年籍二部爲軍置廣西路洪武十六年平雲南廣西來歸附四月以土官普德權署廣西府事二十年廣西知府普德彌勒州知州赤善師宗州知州阿的各遣人貢馬詔賜文綺鈔錠二十四年雲南左布政張統奏維摩雲龍永寧浪渠越順等州縣蠻民頑惡不遵政教宜置兵戍守以控制之永樂六年十月土官知府阿覺遣把事阿定等來朝貢馬賜鈔幣遣還七年彌勒州土官知州者克遣人來朝貢馬賜

鈔及襲衣洪熙元年師宗土官同知瓏吾來朝貢馬宣德五年彌勒州故官知州者克子樊習等貢馬正統六年總兵官沐昂奏師宗州及廣南府賊徒阿羅阿思糾合爲亂命昂等招諭之未幾平成化中土知府昂貴有罪革知府以冠帶安置彌勒州因置流官以賀勛爲知府始築土城嘉靖元年設雲南彌勒州十八寨守禦千戶所其部衆好擄掠無紀律故久不用至水西烏撒用兵復征調之崇禎間巡按傅宗龍由滇入黔招普兵以行時滇中最勦爲沙普兵亦曰昂兵

鎮沅古濮洛雜蠻所居元史謂是和泥昔樸二蠻也唐南詔蒙氏銀生府之地其後金齒蠻繼據之元時爲威遠蠻棚府屬元江路總管洪武十五年故元總管刀平與兄那直歸附

授千夫長三十五年置鎮沅州以千夫長刀平爲知州永樂三年七月刀平率其子來朝貢方物賜鈔文綺從征八百又從攻石崖者達寨外部整線來降入貢方物陞鎮沅州爲府以刀平爲知府置經歷知事各一員五年刀平遣子騰來朝謝恩十一月遣頭目刀線呼等貢方物賜予如例宣德九年土官知府刀騰遣子安來朝貢金銀器皿象馬等方物賜綵幣及金織紵羅襲衣成化十七年以地方未平免鎮沅諸土官朝覲正統元年復免其朝貢嘉靖中征安銓調鎮沅兵千人命刀寧息領之復調其子刀仁率兵千人征那鑑克魚復寨守之初鎮沅印爲那氏所奪於是始得印以獻命給之領長官司一曰祿谷寨永樂十年置



永寧昔樓頭蹠地接吐蕃又名荅藍唐屬南詔後爲麼些蠻所據元憲宗時內附至元間置荅藍管民官尋改置永寧州屬北勝府洪武平雲南時屬鶴慶府二十九年改屬瀾滄衛十二月永寧州土賊卜百如加劫殺軍民前軍都督僉事何福遣指揮李榮等領兵討之其子阿沙遁入革失瓦都寨官軍齎三日糧深入追之會天大雪衆飢疲賊據險不下軍乃還永樂四年四月設刺次和瓦魯之革甸香羅四長官司隸雲南永寧衛以土酋張首爲刺次和長官阿直爲瓦魯之長官阿措爲革甸長官八非爲香羅長官各給印章并賜冠服銀帶綵幣時首等來朝貢馬故有是命陞永寧州爲永寧府仍隸雲南布政使司命土官知州各吉八合爲知府嘉其能

修職貢也尋遣永寧土知府各吉八合齎救往大西番撫諭其蠻衆宣德四年永寧蠻寨矢不刺非糾合四川鹽井衛土官馬刺非殺永寧知府各吉八合去官軍撫諭之已命卜撒襲知府矢不刺非復殺之已命卜撒之弟南八襲而馬刺非據永寧節卜上下三村逐南八大掠夜白尖住促卜瓦諸寨事聞帝命都督同知沐昂勒兵諭以禍福并移檄四川行都司下鹽井衛諭馬刺非還所據村寨正統二年馬刺非爲南八所攻拔烏節等寨南八亦言馬刺非殺害詔沐晟公同三司驗問曲直令其各歸侵地事乃寢永寧界東至四川鹽井衛十五里西至麗江寶山州南至浪渠州北至西番領長官司四曰刺次和曰瓦魯之曰革甸曰香羅

順寧府本蒲蠻地名慶甸宋以前不通中國雖蒙氏段氏不能制元泰定間始內附天曆初置順寧府并慶甸縣後省入府洪武十五年定雲南順寧府歸附遂以土蠻阿悅貢署府事十七年命阿日貢爲順寧府知府二十三年十二月順寧土酋猛丘等不輸徵賦自相仇殺大理衛指揮鄭祥征蒙化賊移師至甸頭破其寨猛丘請降輸賦祥乃還二十九年十二月土酋阿羅等伏誅先是其土官知府子丘與其叔父猛丘相仇殺至是猛丘死把事阿羅火頭字求等相攻擊西平侯沐春遣大理衛指揮鄭祥李榮等分道進討遂擒阿羅字求等誅之永樂十九年順寧府土官知府猛英遣弟猛英等貢駝馬賜鈔幣洪熙元年順寧府土官知府猛英遣弟勳等

來朝宣德六年故土官知府猛英弟蓋千夫長阿里姪阿和等來朝貢馬賜予如例初順寧與大侯接境大侯土舍奉赦奉學兄弟不相能而奉學乃順寧土知府猛廷瑞之婿也倚廷瑞與兄赦日構兵巡撫陳用賓檄參政李先著副使邵以仁勘處以仁竟襲擊廷瑞平之因請改順寧府爲流官而先著初極言不可討被謗語逮獄瘐死然廷瑞實無反謀初參將吳顯忠者知廷瑞巨富誣以助惡索其金不應遂讒於巡按張應揚而信之轉訴巡撫陳用賓廷瑞大恐不得已斬奉學以獻顯忠益誣激其陰事傳以反狀撫按會奏得旨大勦廷瑞出獻印獻子以候命不從顯忠帥兵搗其寨盡取其十八代蓄貲數百萬誘廷瑞至會城擒之獻捷於朝於是所

部十三寨盡憤真聚兵反用賓悉勦除之并殺其子以此超擢右都御史磨子未幾坐大辟繫獄應揚亦遂卒人以為天道云順寧附境有猛猛撒猛緬所謂三緬也猛猛最強部落萬人時與二猛為難其地田少箐多射獵為生緬地雖廣衍而民柔弱部長賜冠帶最忠順猛撒微弱後折入於耿馬蒙化唐屬姚州都督府後蒙氏細奴邏築城居之號蒙舍詔宋時段氏改開南縣元初置蒙舍千戶所至元中改府尋陞為路復降為州屬大理洪武時仍屬大理十七年以左禾為蒙化州判官施生為蒙化州正千夫長二十三年十一月西平侯沐英以蒙化所管火頭字青等梗化不服宜置衛命指揮僉事李聚守蒙化十二月大理衛指揮使鄭祥捕斬蒙化

叛賊高天惠傳首雲南永樂九年土官知州左禾正千夫長阿束來朝貢馬賜鈔幣有差既左伽以兵與麓川戰於大侯功第一累陞中憲大夫臨安府知府掌州事洪熙元年土官左伽等貢馬賜鈔幣宣德七年土官知州左伽遣姪青木來朝貢馬正統中陞州為府遂以左伽為知府世襲所部在江內諸蠻性柔頗馴擾在江外數枝以勇悍稱每應征調多野戰無行伍成化十七年巡撫奏地方未寧免蒙化土官明年朝貢正統元年詔復免其入覲萬曆四十八年雲龍土知州段龍死子嘉龍立養子段進忠殺嘉龍爭襲流劫殺掠官軍進討進忠從間道欲趨大理四面圍逼不能戰被擒誅之改土為流授段氏世吏目一人

孟良蠻名孟措自古不通中國永樂三年七月來歸設孟良府隸雲南都司以互指土官刀哀為知府給印誥及賜冠帶時刀哀遣人來朝請設治所歲辦差發黃金六十兩六年十二月土官知府刀交遣弟刀哈哄貢象及金銀器皿禮部言刀交嘗構兵攻劫鄰境譎詐不誠宜却其貢帝曰蠻夷能悔過來朝往事不足責命賜鈔及絨錦綺帛十年土官知府遣頭目板達等來朝賜予如例宣德六年土官知府刀光遣頭目招板陸等貢馬及金銀器皿方物賜賚有加仍命內官楊琳齋敕及綵幣往賜刀光等正統間孟良地多為木邦所并景泰六年四月孟良府頭目板孟內等來朝貢方物陞辭命齋敕及綵幣歸賜其土官知府慶馬辣及其妻孟良在姚關

身南二千甲沃野千里最殷富地多虎農者於樹杪結草樓以護稼雲南知府趙渾一入其境待之禮慢後無復至者

孟定蠻名景麻元至元中立孟定路軍民總管府領一甸隸大理金齒等處宣慰司洪武三十五年九月孟定府土官刀名扛來朝貢方物詔賜綺帛其來使俱賜鈔幣十一月設孟定府以刀渾立為孟定知府永樂二年四月孟定土官刀景發遣頭目刀罕來朝貢馬賜鈔羅綺十月遣使賜誥印冠帶襲衣於孟定府及波勒復頒信符金字紅牌四年五月帝以孟定道里險遠每歲朝貢令自今年一貢著為令如慶賀謝恩之類不拘此例五年四月土官遣頭目招剛來朝貢馬賜鈔幣六年八月刀名扛遣頭目刀怕旺等貢方物賜文綺

表裏十年乃名扛遣人朝貢賜予如例初孟璉與孟定皆麓川地其土目皆故等夷惡相屬後改孟璉隸雲南孟定與孟璉多以互侵土地仇殺宣德六年土官知府罕顏法以爲言勅黔國公沐晟遣官撫諭俾各歸侵掠安分守職無貽後悔正統中麓川叛孟定知府刀祿孟遠遁木邦罕葛從征有功總督王驥奏令食孟定之土嘉靖間木邦罕烈據地奪印令舍人罕慶管食之名爲耿馬地之所入悉歸木邦萬曆十二年官兵取隴川克耿馬以罕葛之後令爲知府十五年頒孟定府印崇禎末孟定叛屬緬甸自姚關南八日入其疆西接隴川東連孟璉南木邦北鎮康土瘠人稀有景杏土城馬援城在焉領安撫司一曰耿馬其地與孟定隔墮哩江孟定居

其南耿馬居其北萬曆十二年始設宣撫司以們罕爲宣撫使罕死弟們罕金護印屢奉朝貢時木邦思禮侵灣甸鎮康倚罕金爲聲援天啓二年緬攻猛乃孟良罕金欲救之緬移兵攻金厚賂之乃解後與木邦罕正構難不絕云

曲靖隋恭協二州地唐置南寧州改恭州爲曲州分協州置靖州至元初置磨彌部萬戶後改爲曲靖路宣慰司洪武十四年征南將軍下雲南元曲靖宣慰司征行元帥張麟行省平章劉輝等來降十五年二月改曲靖千戶所爲曲靖軍民指揮使司置曲靖軍民府十六年霑益州土官安索叔安磁等貢馬及羅羅刀甲氍衫虎皮詔賜安磁紗帽金帶綺羅衣各一襲錦織金文綺帛鈔錠并從人把事等賜有差十一月

羅雄州土酋納居來朝賜綺帛鈔十七年改霑益衛爲千戶所十月曲靖亦佐縣土酋安伯作亂命西平侯沐英發兵討之兵至其境安伯懼出降十八年曲靖越州土酋龍海來朝貢馬二十年十二月越州土酋阿資與羅雄州營長發東等叛命英會征南將軍傅友德將兵討之阿資者土官龍海子也越州蠻言爲苦麻部元末龍海居之部屬俱囉囉斯種王師征南時英駐兵其地之湯池山諭降之龍海遂遣子入朝詔以龍海爲知州尋卽爲亂英以計擒之徙居遼東至蓋州病死阿資繼其職益桀驁梗化至是叛友德等進討道過平夷以其山險惡密邇龍海宜築堡駐兵屯守遂遷其山民往居卑午村留神策衛千戶劉成等領兵千人置堡於其地後

以爲平夷千戶所是月阿資等率衆寇普安燒府治大肆剽掠友德率兵擊之斬其營長者滿已青二十一年正月友德等擊走阿資土官普旦來降尋阿資退屯普安倚崖壁爲寨友德以精兵蹙之蠻衆皆緣壁攀崖墜死者不可勝數生擒一千三百餘人獲馬畜甚衆阿資遁還越州二月追擊敗之斬其黨火頭弄宗五十餘人阿資窮蹙請降初阿資之遁也揚言曰國家有萬軍之勇我地有萬山之險豈能盡滅我輩英乃請置越州馬龍二衛扼其險要又分兵追捕至是遂降二月英等以陸涼西南要衝地請設衛屯守命洱海衛指揮僉事滕聚於古魯昌築城置陸涼衛指揮使司守之帝以雲南列置戍兵平夷尤當南北要衝四面皆諸蠻部落宜置衛

屯兵鎮守乃命開國公常昇往辰陽集民間丁壯凡五千人遣右軍都督僉事王成千戶盧春統赴平夷置衛改平夷千戶所爲平夷衛指揮使司二十三年七月置越州衛命指揮何鑑等領諸衛軍守之英奏曲靖指揮千戶哈刺不花乃故元守禦陸涼州千戶今置陸涼衛宜調本官於本衛鎮守庶絕後患詔從之二十四年十二月徙越州衛於陸涼州時英以雲南諸蠻皆降服惟阿資恃險屢降屢叛請置衛守從之已而阿資復叛命都督僉事何福爲平羌將軍率師討兵至連捷俘獲甚衆會連月淫雨水溢阿資援絕與其衆降福擇曠地列柵以置其衆西南有木峇箐乃蠻夷出沒之處復調普安衛指揮劉玉領兵置寧越堡鎮之二十六年九月曲靖

馬龍州知州法燈等遣使貢馬及方物二十七年十一月阿資復叛西平侯沐春都督何福率兵討之營於越州城北分兵四面攻之別遣壯士伏於岐路以兵挑戰於是蠻兵悉衆出伏起大敗之阿資脫身遁初曲靖土軍千戶陶保張琳所守地與越州相接其部屬多與貿易春使人陰結陶保等令覘阿資所在及其經行地星列守堡絕其糧道阿資困急二十八年正月福潛引兵屯赤窩舖遣百戶張忠等擣其寨擒阿資斬之俘其黨越州乃平永樂七年五月亦佐縣土官知縣沙舊遣其屬貢馬十二年十一月陸涼州土官知州資求遣人貢馬十八年四月亦佐縣故土官知縣沙舊子沙存來朝貢馬皆予賜如例宣德二年霑益縣知縣斗南遣把事李

英等來朝貢馬陸涼州女土官知州沙共子資曹來朝亦如  
例賜之正統二年曲靖軍民知府晏毅言四事一土官承襲  
或以子孫或以兄弟或以妻繼夫或以妾繼嫡皆無豫定次  
序致臨襲爭奪仇殺連年乞敕該部移文所司豫爲定序造  
冊土官有故如序襲職一請卹陣亡子孫一請雲南官俸悉  
如四川之例一均戶口田地事下所司議行教復請設霑益  
州松韶巡檢從之初嘉靖中羅維知州者濬殺營長而奪其  
妻生子繼榮稍長卽持刀逐濬濬欲置繼榮死其母方嬖不  
忍錮之及濬老無子乃以繼榮代襲繼榮據州卽逐濬濬訴  
之鎮巡官命迎濬歸繼榮陽事之實加禁錮萬曆九年調羅  
雄兵征緬繼榮將行恐留濬爲難遂試濬時霑益土知州安

費元安素儀著州事亦提兵赴調繼榮與之合營通焉  
上倚霑益兵力爲助師過越州留土官資氏家縱淫樂不進  
知州越應奎白於兵備將擒之繼榮走遂聚衆反巡撫劉世  
曾檄諸道兵防亂繼榮遂攻破陸涼鴨子塘陡坡諸寨築石  
城於赤龍山據龍潭爲險廣六十里建龍樓鳳閣而環以羣  
寨實諸軍士妻女於其中益恣淫樂十三年世曾乃檄諸道  
進兵適劉綎破緬解官回世曾檄綎將兵討遂馳普鮮營直  
搗赤龍寨斬諸渠帥楊達孝楊五郎等繼榮遁去綎復破其  
二寨斬王道張道降其衆一萬七千人追奔至阿拜江斬繼  
榮賊平世曾請築城改設流官乃以何倏爲知州者繼仁爲  
巡檢未幾蠻寇必大反殺繼仁執倏參將蔡兆吉等誅必大



定其地乃改羅雄州曰羅平設千戶所曰定雄時霑益安素  
 儀無子以烏撒土官子安紹慶為嗣慶死孫安遠襲為土婦  
 設科所逐遠走死設科率普鮮奈科等焚掠霑益諸堡站陷  
 平夷衛天啓三年官兵擒設科誅之五年安邊據霑益從水  
 西叛事詳烏撒土司傳初越州阿資罪誅永樂間以其子祿  
 寧為土司縣丞與亦佐沙氏分土而居其地南北一百二十  
 里土馬精強征調銀至三千八百兩曲靖境內有交水平夷  
 衛去交水二舍與黔壤接連滇師出上六衛必山之道天啓  
 初用兵水西撫臣議曲靖鎖鑰全滇交水當黔滇兩路之衝  
 乃阨塞要地平夷右所宜移置交水平險築城俾與平夷衛  
 相望互為聲援便從之

明史藁

列傳第一百八十八

光祿大夫

經筵講官明史總裁戶部尚書加七級王鴻緒奉

敕編撰

雲南土司二

姚安

鶴慶

武定

尋甸

麗江

元江

永昌

新化

威遠

北勝

灣甸

鎮康

大侯

瀾滄衛

麓川

隴川附

姚安本漢弄棟蜻蛉二縣地唐置姚州都督府以其民多姚  
 姓者天寶間南詔蒙氏改為弄棟府宋時段氏改姚州元立

統矢千戶所天曆間陞姚安路洪武十五年定雲南改路爲府後又改爲姚安軍民府十六年姚安府土官自久作亂都督陳桓率兵討之兵至九十九莊自久遁去十七年自久寇品甸西平侯沐英奏以土官高保爲姚安府同知高惠爲姚州同知保惠從西平侯擊自久平之二十年命普定侯陳桓靖寧侯葉昇往雲南總制諸軍於定邊姚安等處立營屯種時高惠治姚安安輯其民稱能吏二十六年保以襲職遣其弟貢馬謝恩宣德九年姚安土官知府高賢遣姪官音禾等來朝貢馬弘治中土官高棟與普安叛賊戰死於板橋驛嘉靖三十年土官高鶴當元江之變布政使徐樾遇害奮身赴救死之萬曆中同知高金曾以征緬功賜四品服大姚縣有

鐵索箐者本徠種依山阻險從未內附以剽掠爲業旁郡皆受其害弘治間稍有歸命者分隸於姚安姚州嘉靖中始專屬姚安久之其渠羅思者有幻術造僞印稱亂萬曆元年巡撫鄒應龍與總兵官沐昌祚討平之諸郡乃安

鶴慶唐時名鶴川南詔置謀統郡元初內附置鶴州至元中陞鶴慶府尋改爲鶴慶路洪武十五年征南將軍藍玉等遣兵攻三營萬戶砦拔之獲僞參政寶山帖木兒等六十七人置鶴慶府以土官高隆署府事十七年以董賜爲鶴慶府知府高仲爲鶴慶府同知賜之子節爲安寧知州楊奴爲劍川州知州十一月賜率其千夫長百夫長二十五人來朝貢馬及方物詔賜織金文綺布帛鈔錠及冠帶十八年以賜爲雲

南前衛世襲指揮僉事賜雲南府安寧州人世守其土及王師入雲南率衆來降復從大軍討賊有功詔授中順大夫鶴慶府世襲知府其子節授奉訓大夫安寧州知州至是賜來朝自以父子俱受顯榮無以補報而其子幼冲不達政治乞還父子所授官而自爲安寧州知州帝曰爾能綏靖邊鄙故授爾官庶報爾功今爾辭尊居卑奈何命潁國公傅友德及諸大臣議之皆以賜既有功不可聽其辭而節之官則可免乃改賜明威將軍雲南前衛世襲指揮僉事帝諭之曰雲南前衛密邇安寧故特命爾是職爾其綏輯遠人以安邊鄙其毋再辭二十年劍川州土官楊奴叛大理衛指揮鄭祥率兵討之斬其黨八十餘人楊奴遁走未幾還劍川復聚蠻人爲

亂祥復以兵擊斬之賊遂平二十四年三月置鶴慶衛三十年改鶴慶府爲軍民府永樂十五年順州知州王義言州僻蠻地然歸附以來濡被聖化三十餘年聲教所屆言語漸通子弟亦有俊秀請建學教育從之宣德元年順州故土官同知子清妻觀音銘來朝貢馬以觀音銘爲本州同知不世襲初子清卒無嗣土人以觀音銘爲蠻人所信服送至京吏部以非世職不當襲帝以蠻心旣相信其從之但世襲祖宗成憲不可違也四年故土官知事董宗子壽遣頭目來朝貢馬賜壽鈔幣表裏襲衣故土官知府妻楊氏來朝貢馬賜鈔綵幣絹及金織紵絲襲衣有差七年故土官知府高寶妻楊氏同其子倫來朝貢馬賜鈔正統二年敕黔國公沐昂等曰

比得副使徐訓奏鶴慶土官知府高倫同弟純屢逞奸兇屠戮士庶與母楊氏并叔宣互相賊害滅倫絕理肆惡如此罪豈容貸爾等其諭使輸款如恃強不服宜卽調軍擒捕五年敕昂等曰比聞土知府高倫妻劉氏同倫弟高昌豪民洪眷等糾集囉囉麼些人衆肆行兇暴事覺不從逮訊敕至卽委官至彼勘實量調官軍逮擒首惡赦其脅從其千戶王蕙及高倫叔高宣劉剛等諸罪人併逮至京質問八年敕僉都御史丁璿以往者鶴慶軍民府民楊仕潔妻阿夜珠告土官知府高倫謀殺其子觀卽命法司移文勘驗旣而大理衛千戶奏報倫擅率軍馬欲謀害親母楊氏又稱其母告倫不孝及倫私斂民財多造兵器殺戮軍民支解梟令等罪遂救黔國

公沐晟等體覆及奏至言倫所犯皆實及倫赴京訴冤蕙又奏其妻劉氏與百戶劉剛等協同爲惡都察院已逮各犯問擬重刑今倫累訴止因與叔宣爭襲官職宣令阿夜珠妄告又因與蕙爭娶周氏爲妾蕙挾仇誣陷其所勘殺死者皆病死及強盜拒捕之人倫母楊氏至京亦訴倫無不孝之事實宣等陷害今蕙逮至京師卽輸款與倫同詞除釋剛等六人械繫倫蕙以俟體勘今特敕爾及御史嚴恭親詣鶴慶地方設法密訪務得倫所犯及陷害實情奏報旣而奏當倫等皆伏誅先是鶴慶本其土人高氏世襲爲知府至是倫以罪死而其族無可繼者兵部尚書王驥請別推帝命擇老成廉幹者以綏遠蠻乃擢瀘州知州林道節爲知府鶴慶府之改流

官於是始

武定南詔三十七部之一宋淳熙間大理段氏以阿歷爲羅武部長三傳至矣格當元世祖時爲北部土官總管至元七年改武定路置南甸縣洪武十四年雲南下武定路女土官商勝首先歸附十五年改武定路爲武定軍民府以勝署府事十六年六月勝遣其叔阿額來朝貢馬詔賜勝錦二匹阿額錦一匹及襲衣鈔錠十月詔授勝誥并朝服及織金羅衣紗帽金帶十七年以和曲土官豆派爲知州勝貢馬賜以綺帛鈔錠二十一年正月發內帑令武定德昌會川等市馬三千匹二十六年勝以病不能任事請以子海積襲職從之洪熙元年女土官知府商智遣把事者卑來朝宣德元年三月

元謀縣故土官知縣吾忠之政來朝天順元年武定知府吳本奏乞誥命帝以土官特誥以之正德二年四月武定軍民府境自是月乙丑雨雹溪水漲決堤壞田霜露殺麥如冬虎爲害七月廢武定所轄南甸石舊二縣以南甸之戶口田糧并所屬乾海子巡檢改隸和曲州石舊之戶口田糧改隸祿勸州三年土官知府鳳英以有軍功陞布政司右參政仍知府事至是請乞金帶禮部以無成例不准帝以英有軍功給之四年鳳英貢馬謝恩賜如例嘉靖七年三月土舍鳳朝文作亂殺同知以下官吏劫州印與兵與尋甸反賊安銓合攻雲南府撫臣以聞是時安銓未下朝文復起滇中大擾詔以右都御史伍文定爲兵部尚書坦督雲貴川湖等處軍務調四

鎮土漢官軍討之以刑部侍郎梁材爲戶部侍郎督理糧儲給銀三十萬兩備軍需五月黔國公沐勛疏言臣奉命會同巡撫等調發官軍分道進剿叛賊安銓鳳朝文復多方撫諭而諸賊抗逆執聞所遣官軍蔣銓丁全二人所調集各土舍又重自疑畏臣謹以便宜榜示各土舍先給冠帶待後奏請承襲衆始感奮於二月初十日進兵擊斬強賊十餘人賊勢挫遂執殺蔣銓丁全奔遁尋甸武定府乞敕部授臣方略俾獲便宜行事并宥各土舍往罪凡有功者俱許承襲作其敵愾之氣帝納之賜救獎勵六月叛寇安銓鳳朝文旣敗於會城其黨稍稍解散初朝文給其衆謂知府鳳詔母子已戮朝廷且盡勦武定蠻衆至是詔同其母率衆自會城往蠻民

顧錯愕咸投詔降朝文計無所出絕普渡而走官兵追及復敗之朝文率家奴數人取道霑益州奔至東川之湯郎等爲追兵所及裂其屍而死銓衆猶盛遁駐尋甸故巢列寨數十官兵分哨夾攻之諸寨先後破乃併力攻其必古老巢潰之銓亾奔東川擬入苾部爲土舍麻慶所執賊平是役也生擒渠賊及逆黨千餘人斬首二千九百餘級俘獲男婦千二百餘撫散蠻黨二萬有奇奪器械牛馬無算於是鎮巡官黔國公等以捷聞銓朝文皆梟示籍其產家屬戍邊十六年命土官知府瞿氏掌印初本府印自洪武以來俱土官掌之正德間有司議以流官同知署印土官知府職專巡捕徵糧而已自此繼襲二十餘年俱未掌印及鳳詔故瞿氏以母襲子官

而所轄四十七馬頭阿台等數請以印屬瞿氏有司勘議非便吏部覆言掌印係舊例宜如其請從之二十七年瞿氏差把事馬得榮等來朝貢馬給賞如例四十二年瞿氏老舉鳳詔妻索林自代既而悔之比索林襲遂失事姑禮瞿氏大恚乃收其姪兒繼祖人鳳氏宗挾其甥婿貴州水西土舍安國亨四川建昌土官鳳氏力欲廢索林以繼祖嗣職不克乃具疏自稱為索林囚禁令繼祖詣門告之繼祖歸卽詐稱受朝命襲職驅日兵逼奪府印索林抱印歸奔會城時撫按官莫無事使人諭解之歸索林武定令視事如故而復聽繼祖瞿瞿氏所由是婦姑嫌隙日深左右復各慫恿之索林謀誅繼祖事洩繼祖遂大發兵圍府行劫和曲祿勸等州縣殺傷謂

至土官王心一等兵索林復抱印奔雲南巡撫曹忭下令收索林印逮其左右鄭竑繫獄令瞿氏暫理府事貸繼祖責其自新四十四年添設武定軍民府通判一員四十五年築武定新城成巡撫呂光洵遣鄭竑回府復業鄭竑者前爲土官索林謀殺繼祖者也繼祖知其回執竑殺之糾衆攻新城臨安府通判胡文顯督百戶李鰲土舍王德隆進拔至雞溪子隘道遇伏鰲及德隆俱死僉事張澤督尋甸兵二千餘馳救兵亦敗澤及千戶劉裕被執鎮巡官促諸道兵並進逼繼祖東山寨圍之繼祖懼攜澤及索林走照姑已復殺澤官軍追之急由直勒渡過江趨四川遁入會里州依東川婦家阿科等巡按劉思問以狀聞於是乃敕雲南四川會兵討鳳繼祖

初繼祖之遁依東川也土官鳳氏與之通已而見滇蜀官軍與土舍祿紹先等兵皆會乃背繼祖發卒七千人來援繼祖益窮賊帥者色赴紹先營降斬繼祖以獻餘黨姚安府同知高欽及弟鈞謀主趙士傑等竝為姚縣土官高繼先所擒皆伏誅初繼祖既叛誅索林削籍安置會城於是雲南鎮巡官議改設流官代之猶不欲絕鳳氏後以鳳曆為故土知府索林支屬授鳳曆子思堯經歷給莊百餘處鳳曆以不得知府怨望陰結四川七州及水西宣慰安國亨謀作亂流官知府劉宗寅遣諭之不聽遂聚眾稱思堯為知府夜襲府城城中嚴備不能入退屯魯墟宗寅夜出兵斫其營賊潰追至馬刺山遂擒鳳曆餘黨悉解鎮巡官以聞帝命誅曆萬曆三十五

年叛酋鳳繼祖姪阿克久徙金沙江外賊黨鄭舉鄭文僕堯司等誘克復為土官克因結江外會川諸蠻直陷武定大肆劫掠索府印會流官知府攜印於會城不能得賊以無印難號召劫推官請冠帶印信鎮撫懼差人以府印授之賊退入武定立阿克為土知府鎮撫調集土兵分五路進勦克復武定元謀羅次祿豐高明等州縣擒阿克鄭舉僕堯司等竝家屬械至京詔磔於市家屬給功臣家為奴武定平遂悉置流官

尋甸古滇國地獫狁蠻居之號仲割溢源部後為烏蠻喬斯丁所奪號斯丁部蒙氏為尋甸段氏改仁德部元初置仁德萬戶後改仁德府洪武十五年定雲南仁德府土官阿孔等



貢馬及方物人賜錦一匹鈔五錠尋改仁德府爲軍民府既  
又改爲尋甸軍民府十六年八月土官安陽來朝貢馬三十  
五匹及虎皮氈衫等物詔賜衣服錦綺鈔錠十七年以尋甸  
土官沙琛爲知府二十年徵琛親叔阿孔等赴京琛遣子安  
寧貢馬二十三年四月置木密關守禦千戶所於尋甸軍民  
府之甸頭易龍驛又設置屯所於甸頭里果馬里聯絡耕種  
以爲邊備三十五年以雲南土官知府沙姑男婦沙觀襲知  
府正統元年土官妻沙仲來朝景泰元年故土官知府沙仲  
子安定等來朝貢馬賜綵幣表裏鈔錠成化十二年兵部奏  
土官舍人安宣聚衆剽掠殺鹵居民宜令鎮守官相機撫捕  
從之十四年尋甸知府安晟死兄弟爭襲遂改尋甸知府爲

流官嘉靖六年土舍安銓作亂侵掠尋甸府嵩明州木密楊  
林等處巡撫傅習檄守巡官以兵討之大敗賊遂陷尋甸嵩  
明殺指揮王昇唐功等知府馬性魯棄城走時武定鳳朝文  
叛銓與合兵攻雲南會城未幾銓敗走苾部爲土舍祿慶所  
殺尋甸平

麗江越析詔地南詔蒙氏置麗水節度於此宋時麼些蠻蒙  
醋據之大理莫能有元初討平之置茶罕章宣慰司至元中  
改置麗江路軍民總管府後罷府置宣撫司洪武十五年改  
麗江府後改軍民府十六年蠻長木德來朝貢馬賜襲衣有  
差十七年正月以木德爲麗江府知府羅克爲蘭州知州四  
月木德貢馬詔賜錦綺鈔帛十八年巨津州土酋阿奴聰叛

襲劫石門關千戶浦泉戰死吉安侯陸仲亨率指揮李榮鄭祥討之復其關賊戰敗遁入山谷捕獲誅之木德從征有功又從西平侯沐英征景東定邊皆有功予世襲二十四年木德死其子初當襲而初守巨津州石門關與西番接境旣襲職無守之者英請以初之弟虧爲千夫長戍守從之二十六年十月西平侯沐春奏麗江府土民每歲輸白金七百六十兩皆廢些洞所產土民以馬易金不諳真僞請令以馬代輸爲便從之三十年改麗江府爲麗江軍民府從春請也永樂九年九月木初遣人貢馬賜鈔幣十六年正月麗江軍民府檢校龐文郁言本府寶山巨津通安蘭州四州歸化日久請建學校從之二十二年麗江軍民府千戶長阿朶通貢馬賜

鈔幣表裏有差洪熙元年四月蘭州土官知州羅牙等遣使貢馬賜鈔幣遣還十月通安州石門關巡檢司故土官巡檢阿吉子阿俗等來朝貢馬及方物賜鈔幣尋以阿俗襲石門關巡檢宣德五年十二月麗江軍民府奏浪滄江寨蠻者保等聚衆劫掠村寨黔國公沐晟委官撫諭不服以聞兵部請再行招撫報可已羅牙等奏大營諸寨首者保等不供賦役如故昨蒙遣官招諭復拒命請發兵討之帝命黔國公及雲南三司等相機行勿緣細故激變蠻民九年木初遣子森及把事楊實來朝貢正統五年賜土官知府木森請命加授大中大夫資治少尹以殺獲麓川功也成化十一年土官知府木欽奏鶴慶軍民府千夫長趙賢累糾羣賊越境殺掠人民

乞調旁衛官軍擒勦命移知守臣計其宜嘉靖三十四年詔  
故麗江知府木公男高襲職三十九年高進助殿工銀二千  
八百兩詔加文職三品服色給誥命四十年又進木植銀二  
千八百兩詔加高於知府原職上進一級授亞中大夫給誥  
命隆慶四年命高嫡長子東襲父職萬曆十三年土官木旺  
貢馬求旌額禮部以非故事乃賜敕褒之三十二年巡按宋  
興祖奏內監楊榮欲責麗江土官退地聽採竊以麗江自太  
祖高皇帝令木氏世官守石門以絕西域守鐵橋以斷吐蕃  
滇南藉爲屏蔽今無故使之退地聽採必失遠蠻之心使其  
順命是國家歲歲有吐蕃之防倘或不聽諭豈獨有傷國體  
害更有不可勝言者必如榮議德榮自有利害臣不敢干預

以悞封疆疏上事得寢三十八年知府木增以征蠻軍興助  
餉二萬餘兩乞比北勝州土同知高承祖土舍高光裕例加  
級驗封司題覆加以三品服色巡按參其違越請奪新恩申  
明舊例從之四十七年增輸銀一萬兩助充道餉泰昌元年  
錄增功賞銀二十兩紵絲二表裏其子懿及舍目各賞銀幣  
有差天啓二年增以病請告加本布政使司左參政職銜致  
仕五年特給增誥命以旌其忠雲南諸土官知詩書好禮守  
義以麗江爲稱首云

元江古西南夷極邊境曰惠籠甸又名因遠部南詔家氏以  
屬銀生節度徙白蠻蘇張周段等十姓戍之又開威遠等處  
置威遠睽後和泥侵據其地宋時儂智高之黨竄居於此和

泥又開羅槃甸居之後爲麼些徒蠻阿夔諸部所有元時內附至元中置元江萬戶府後於威遠更置元江路領羅槃馬籠等十二部屬臨安廣西元江等處宣慰司洪武十五年改元江府十七年二月元江土官那直來朝貢象以那直爲元江府知府賜襲衣冠帶十八年置因遠羅必甸長官司秩六品設流官長官一員土官副長官一員以白文玉爲副長官二十年六月遣經歷楊大用往雲南練兵時百夷屢爲邊患帝欲發兵平之故遣大用至元江等府整練土官兵也二十六年正月置元江府儒學二十七年正月元江府土官知府那榮因遠羅必甸長官司長官白文玉等來朝貢永樂三年七月那榮來朝貢方物賜予如例又加賜榮金帶一束文綺

衣三襲錦十八匹銀百五十兩鈔六百錠并賜其廉從鈔幣有差遂陞本府爲元江軍民府給之印信那榮請躬率兵及餽運往攻八百帝嘉勞之元江府又奏石屏州洛夾橋每歲江水衝壞止令本府修理民不堪乞命石屏州協治從之九年那榮率頭目人等來朝貢馬及金銀器賜予如例十二年故土官知府那直男那邦人貢方物宣德五年十一月黔國公沐晟奏元江土官知府那忠被賊刀正刀龍等焚其解字及經歷印信今獲刀龍刀洽赴京乞如永樂故事發遼東安置以警邊夷從之命禮部鑄印給之正統元年因遠羅必甸長官司遣人來朝貢馬正德二年以那端襲元江軍民府土官知府嘉靖二十五年土舍那鑑殺土官知府那憲奪其印

及封收因遠驛印記鑑憲叔也巡撫應大猷以聞命鎮巡官發兵勦之二十九年那鑑既殺土官擅府事懼朝廷見討密約交蠻武文淵謀亂撫按官胡奎林應箕總兵沐朝弼以聞因請用副使李維參政胡堯時督兵勦之制可時那鑑抗不奉詔益縱兵攻掠村寨總兵官沐朝弼巡撫石簡調武定北勝亦佐等土漢兵分五哨各監以二司官以左布政徐樾督兵餉調兵既集朝弼簡駐臨安分部進兵破木龍寨降甘莊賊勢漸蹙那鑑遣經歷張維及生儒數人詣南羨監督王養浩所乞降時樾以督餉至南羨適與維遇樾迂閣問維言謂鑑誠計窮乃與約翌日令鑑而縛出城樾親來受降養浩及樾所親信者咸謂夷詐不可信樾不聽如期率百人往至城

下鑑縱象馬夷兵突出衝之樾及左右皆死巡按趙炳然以聞并參朝弼簡及養浩等失事罪帝降敕切責樾簡職養浩等各住俸尅期捕賊贖罪七月鎮巡官沐朝弼石簡督集五哨兵環元江而壁令南羨哨督兵渡江攻城邊路通哨甘莊哨各精卒二千佐之那鑑知二哨精卒悉歸南羨潛遣兵象乘虛衝路通哨官兵不意賊至倉猝燒營走監督郝維嶽奔入甘莊哨甘莊亦大潰督哨李維亦遁惟餘南羨逼城而軍武定女土官瞿氏寧州土舍祿紹先廣南儂兵頭目陸友仁咸恨那鑑戕主奪嫡誓死不退督哨王養浩因激獎之翌日鼓譟攻城賊大敗閉門不出官兵圍之鑑乞降官兵懲徐樾之敗不應城中析屋而爨斗米銀三四錢時瘴毒起大兵乃

復撤期秋末征之朝弼以事聞帝定二哨失事諸臣之罪行  
撫臣厚賞翟氏祿紹先陸友仁等救朝弼會同新撫臣鮑象  
賢鳩兵討賊三十二年象賢至鎮調集土漢兵七萬人廣集  
糧運寇期分哨進勦元江爲必取計那鑑懼伏藥死象賢檄  
百戶汪輔入城撫諭其衆擒斬戕土官那憲之阿捉殺布政  
徐樾之光龍光色等首以獻鑑子恕輸所占那旂封鑿等村  
寨并出所掠鎮沅府印納象十二隻輪屢歲逋賦象賢命官  
民推那氏當立者衆舉前土官那端從孫從仁象賢疏言其  
狀請廢恕貸其死命從仁暫統其衆加注輔以千戶職督視  
之兵部覆如象賢議萬曆十三年以元江土舍那恕招降車  
壘功許襲祖職賞銀幣領長官司一曰因遠羅必甸

永昌古哀牢國漢武帝時置不韋縣東漢置瀾滄郡尋改永  
昌郡唐屬姚州後爲南詔蒙氏所據歷段氏高氏皆爲永昌  
府元初於永昌立三千戶所隸大理萬戶所至元間置永昌  
州尋爲府隸大理路及置金齒等處宣撫司治於此洪武十  
五年定雲南立金齒衛以元雲南右丞觀音保爲金齒指揮  
使賜姓名李觀十六年永昌州土官申保來朝詔賜錦二匹  
織金文綺二匹衣一襲及鍍花銀帶鞞襪十七年以申保爲  
永昌府同知四月金齒土官段惠遣把事及其子弟來朝賜  
綺帛鈔有差置施甸長官司以土酋阿于爲副長官賜冠帶  
十八年置金齒衛指揮使司二十年五月遣使諭金齒衛指  
揮儲傑嚴武李觀曰金齒遠在邊徼土民不遵禮法爾指揮

李觀處事寬厚名播蠻中爲諸蠻所愛然其下多恃功放肆有乖軍律故特命傑武輔之以觀之寬可以綏遠必傑武之嚴可以馭下敕至其整練諸軍以觀外變二十三年十二月罷永昌府改金齒衛爲軍民指揮使司時西平侯沐英言永昌居民鮮少宜以府衛合爲軍民使司從之置鳳谿長官司以永昌府土官通判阿鳳爲長官二十四年三月置永平衛永樂元年四月賜金齒土官百戶汪用鈔一百錠綠幣四表裏初麓川平緬宣慰司思倫發死其頭目罕酌法據木邦相仇殺西平侯沐晟遣用招安故賞之洪熙元年金齒軍民指揮使司及騰衝守禦千戶所等土官貢馬賜鈔幣宣德五年設金齒軍民指揮司騰衝州置土官知州一員時騰衝守禦

千戶所土官副千戶張銘言其地遠在極邊麓川宣慰思任發不時侵擾乞設州治置官吏與騰衝守禦千戶所相兼鎮撫庶俾其民安業帝從之卽以銘爲騰衝州知州八年置騰衝州庫扛關庫刀關庫勒關古湧二關先是騰衝州奏本州路通麓川緬甸諸處人民逃徙者多有悞差發貢獻舊四百夫長隸騰衝千戶所其庫扛關等五處皆軍民兼守今四百夫已隸本州止州民守之乞於五處置巡檢司以土軍尹黑張保李甫郭節等爲巡檢正統二年皆以非額革之嘉靖元年復設永昌軍民府領州一縣二其長官司二曰施甸曰鳳谿

新化本馬龍他郎二甸阿剌諸部蠻據之元憲宗時內附立

爲二千戶所屬寧州萬戶府至元間以馬龍等甸管民官併於他郎甸置司屬元江路洪武初改名馬龍他郎甸長官司直隸雲南布政司後陞爲新化州十七年以普賜爲馬龍他郎甸副長官宣德八年故長官普賜弟土舍普寧等來朝貢馬賜鈔幣八月黔國公沐晟奏摩沙勒寨萬夫長刀甕及弟刀眷糾蠻兵侵占馬龍他郎甸長官司衙門殺掠人民請遣都督同知沐昂討之帝命遣人撫諭但得刀甕而已毋擾平民正統二年晟等奏刀甕不服招撫請調附近官民兵令都督昂勦捕帝以蠻衆仇殺乃其本性可仍撫諭之事遂不竟其地有馬龍諸山居摩沙勒江右兩岸束隘如峽地勢極險故改州以鎮之云

威遠唐南詔銀生府地舊爲濮落襍蠻所居大理時爲百夷所有元至元中置威遠州洪武十五年平雲南後改威遠蠻棚府爲威遠州三十五年以土官刀算黨爲威遠知州永樂二年刀算黨爲車里所擄奪其地命西平侯諭之乃還算黨并侵地三年五月刀算黨進象馬方物謝頒降敕諭金字紅牌恩命禮部賜之金帶金織文綺襲衣及銀鈔錦綺紗羅綵絹二十二年土官刀慶罕等來朝貢馬及方物賜慶罕鈔八十錠紵絲羅各三四紗二匹賜其頭目以下皆有加宣德三年刀慶罕遣頭目招剛刀著中等來朝賜予如例就令齎敕及金織紵絲紗羅賜之仍給信符勘合底簿八年威遠州奏其地與車里接境累被各土官劫掠播孟實當要衝乞置巡



檢司以把事劉禧爲巡檢從之正統二年土官知州刀蓋罕遣人貢馬及銀器賜綵幣等物并以新信符給之正統六年給威遠州土官信符金牌命合兵勦麓川叛寇七月敕刀蓋罕曰叛寇思任發侵爾境土遣人脅爾從逆爾母招曩猛能秉大義效忠朝廷悉出金貲分賚頭目爾母子躬擐甲冑賈勇殺賊斬其頭目派罕送逐餘賊過江溺死數千斬首數百級得其戰艦戰象仍留兵守賊所據江口之地忠義卓然深足嘉尚今特陞爾正五品授奉政大夫修正庶尹封爾母爲太宜人俱錫誥命銀帶及綵幣表裏酬爾母子勦勞陶孟刀孟經等亦賜賚有差爾宜益勉忠義以副朕懷時西南諸部多相仇殺所給金牌信符燒燬不存景泰六年刀蓋罕隨乃

吾等來朝貢因命其管屬本州人民復給與金牌信符織金文綺賜敕諭遣之成化元年威遠州土舍刀朔罕遣頭目刀昔思貢象馬并金銀器賜予如例其俗勇健男女走險如飛境內有河汲水鍊炭土卽成鹽無秤斗以筭計多寡量之北勝唐貞元中南詔異牟尋始開其地名北方睽徒瀾河白蠻及羅落麼些諸蠻以實其地號成傷睽又改名善巨郡宋時大理段氏改爲成紀鍾元初內附至元中置施州尋改北勝州後爲府屬麗江路軍民宣撫司洪武十五年改爲州屬鶴慶府後屬瀾滄衛永樂五年十二月土官百夫長楊克卽牙舊來朝貢馬賜鈔幣宣德四年五月土官判官高琳子瑛來貢方物請襲父職十年土官知州高瑛來朝貢賜鈔幣正

統七年以北勝州直隸雲南布政司設流官吏目一員以州蠻苦於瀾滄衛官軍侵漁也萬曆四十八年北勝州土同知高世懋死異母弟世昌襲其族姪蘭安稱世昌奸生訟之官不聽世昌懼遁走麗江避之尋還至瀾滄宿客舍蘭圍而縱火殺其家七十餘人發其祖父墓自稱欽授把總大掠麗江知府本增請討之謂法紀弁髦尾大不掉不治將有隱憂上官嘉其義卽調增率其部進勦獲蘭梟之

灣甸蠻名細賧元中統初內附屬鎮康路洪武十七年置灣甸縣永樂元年三月設灣甸長官司以西平侯沐晟奏地近麓川地廣人稠故也尋仍改爲灣甸州以土官刀景發爲知州給印章金牌并置流官吏目一員四年五月帝以灣甸道

里險遠每歲朝貢令自今三年一貢著爲令如慶賀謝恩之類不拘此例六年四月刀景發遣人來朝貢馬及方物賜鈔幣七年刀景發子景懸等來朝貢馬賜予如例宣德八年以土官刀景項弟景辦法繼兄職州有流官吏目一員州鄰木邦順寧日以侵削成化五年灣甸州土官舍人景拙法遣使刀胡猛等來朝貢象馬并金銀器賜宴并衣服綵幣有差萬曆十一年知縣景宗真率弟宗材導木邦叛賊罕皮入寇姚關十一月復入犯宗真死於陣擒宗材斬之景童子幼貸死降爲州判官後從討猛廷瑞有功復舊職灣甸地多瘴有黑泉漲時飛鳥過之輒墮

鎮康蠻名石睽本黑爨所居元中統初內附至元十三年立

鎮康路軍民總管府領三甸洪武十五年改爲鎮康府十七年改爲州永樂二年遣官頒信符及金字紅牌於鎮康州七年以灣甸同知曩光爲知州初鎮康地隸灣甸曩光請增設署所故有是命九年以中官徐亮使西南蠻曩光阻道詔責之至是遣人來朝謝罪十四年鎮康州長官司遣人貢馬賜鈔幣遣還二十一年知州刀孟廣來朝貢馬宣德三年賜鎮康州土目刀門淵等鈔幣有差成化五年知州刀門戛遣使來朝貢馬及金銀器賜予如例仍以羅緞付使歸賜土官及妻鎮康後亦爲木邦順寧所侵削隆慶間知州悶坎者罕虔妻以女因附虔歸緬坎敗死其弟悶恩歸義恩死子悶枳襲木邦思禮誘之歸緬不從天啓二年木邦兵據喳哩江枳奔

姚關守備遣官撫之乃退

大侯蠻名孟祐百夷所居元中統初內附屬麓川路洪武二十四年置大侯長官司永樂二年頒給信符金字紅牌於大侯長官司三年五月大侯長官司長官刀奉偶遣其子刀奉董來朝貢馬及銀器賜鈔幣六年長官刀奉偶遣其弟不納狂來朝貢賜予如例宣德四年陞大侯長官司爲大侯州以土官刀奉罕爲知州時刀奉罕奏大侯蠻民復業者多歲納差發銀二百五十兩而灣甸鎮康二長官民少歲納差發銀各百兩永樂中俱陞爲州乞援二州之例帝諭吏部曰大侯民多復業亦其長官善撫綏也宜增秩以旌之故有是命八年大侯州入貢遣內官雲仙往撫之并賜錦綺有差正統三

年土官刀奉漢男刀奉送來貢辭歸命齋敕并織金文綺絨錦諸物賜刀奉漢并及其妻初奉漢令把事傅永瑤來朝貢馬奏欲與木邦宣慰罕門法共起土兵十萬協同征勦麓川乞賜金牌信符以安民心故特賜之復降敕嘉獎刀奉漢及罕門法七年敕刀奉漢子刀奉送襲大侯州知州賜冠帶印章綵段表裏以奉送能率土兵助討麓川也十一年大侯州知州奉外法等貢銀器象馬賜綵幣衣服有差十二年敕賜大侯州土知州奉敬法刀奉送等并其妻綵幣俱命來使齋與之萬曆中土目奉學壻於順寧土知府猛廷瑞後巡撫陳用賓誣奏廷瑞與學反狀廷瑞斬奉學首以獻學弟赦守大侯如故子奉先不樂設流與其族舍猛麻奉恭爭殺抗命次年討平之改爲雲州設流官焉

瀾滄元爲北勝州地洪武中屬鶴慶府二十八年置瀾滄衛二十九年於州南築城置今衛司領北勝浪渠永寧三州永樂四年以永寧州陞爲府正統七年以北勝州直隸布政司今衛只領州一弘治十一年福建布政李韶以前任雲南參議知土俗事宜上疏言四事一謂瀾滄衛與北勝州同一地域廣遠與四川建昌西番野番相通邇年西番土舍章輓等倚恃山險招服野番千餘家爲莊戶遂致各番生動動輒殺人而州官無兵不能禁止衛官且失廢軍政恬不介意又姚安府大羅衛賓川州地方有賊穴六七軍民受害請添設兵備副使於瀾滄衛城以姚安大羅賓川鶴麗大理洱海景

東諸府州衛所屬之於野番則用撫流民法於賊巢則用立保甲法朝夕經理則內外寇患皆可弭矣因從其議設兵備副使一員於瀾滄城

麓川平緬元時皆服屬緬甸緬甸古朱波地也宋寧宗時緬甸波斯等國進白象緬甸之名自此始緬在雲南之西南最窮遠與八百國占城接境有城郭室屋人皆樓居地產象馬元時最强盛元嘗遣使招之始入貢洪武六年遣使田儼程斗南張祿錢允恭齋詔往諭至安南留二年以道阻不通有詔召之惟儼還餘皆道卒十五年大兵下雲南進取大理下金齒平緬與金齒壤地相接土蠻思倫發聞之懼遂降因置平緬宣慰使司以思倫發爲宣慰使十七年八月思倫發遣

刀令孟入獻方物并上元所授宣慰使司印詔改平緬宣慰使爲平緬軍民宣慰使司並賜思倫發朝服冠帶及織金文綺鈔錠尋改平緬軍民宣慰使司爲麓川平緬宣慰使司麓川於平緬連境元時分置爲兩路以統領其所部至是以思倫發遣使貢命兼統麓川之地十八年十二月思倫發反率衆寇景東都督馮誠率兵擊之值天大霧猝遇寇失利千戶王昇死之二十年敕諭西平侯沐英及諸衛指揮使甯正等曰近御史李原名歸自平緬知蠻情詭譎必爲邊患符到可卽於金齒楚雄品甸及瀾滄江中道葺壘深池以固營柵多置火銃爲守備寇來勿輕與戰又以往歲人至百夷多貪其財貨不顧事理貽笑諸蠻繼今不許一人往平緬卽文移亦

慎荅之母忽明年正月思倫發誘羣蠻入寇馬龍他郎甸之  
摩沙勒寨英遣都督甯正擊破之斬首千五百餘級三月思  
倫發悉舉其衆號三十萬象百餘寇定邊欲報摩沙勒之役  
新附諸蠻皆爲盡力英選師二萬亟趨至賊列象陣搏戰英  
列弩注射矢陣大呼象多傷其蠻亦多中矢斃蠻氣稍縮次  
日英率將士益置火鎗神機箭更番射象奔賊大敗擣其寨  
斬首三萬餘級降卒萬餘人象死者半生獲三十有七思倫  
發遁以捷聞四月帝遣使諭英移師逼景東屯田固壘與相  
持以待大軍集戒勿輕受其降二十二年十一月思倫發遣  
把事招綱等來言往者叛逆之謀實由其下刀厮郎刀厮養  
所爲乞貸死願輸貢賦雲南守臣以聞乃遣通政司經歷楊

大甲齋敕往諭思倫發修臣禮悉償前日兵費庶免問罪之  
師思倫發聽命遂以象馬白金方物入貢謝罪大甲并令獻  
前叛逃者及把事刀厮郎等一百三十七人平緬遂平自是  
三年每來朝貢二十七年正月思倫發來朝貢馬象方物已  
遣京衛千戶郭均英往賜思倫發公服幘頭金帶象笏二十  
八年緬國王使來言自天屢以兵侵奪其境土明年緬使復  
來訴帝乃遣行人李思聰等使緬國及百夷思倫發聞詔俯  
伏謝罪願罷兵適其部長刀餘蓋叛思聰以朝廷威德諭其  
部衆叛者稍退思倫發欲倚使者服其下強留之以象馬金  
寶爲賂思聰諭却之歸述其山川人物風俗道路之詳爲百  
夷傳紀以進帝褒之初平緬俗不好佛有僧至自雲南善爲

因果報應之說思倫發信之又有金齒戍卒逃入其境能爲火銃火砲之具思倫發喜其技能俾繫金帶與僧位諸部長上刀榦孟等不服遂與其屬叛攻騰衝思倫發率其家走雲南西平侯沐春遣送至京師帝憫之命春爲征南將軍何福徐凱爲副將軍率雲南四川諸衛兵往討刀榦孟并遣思倫發歸雲南駐怒江上招諭其部衆賜思倫發黃金百兩白金百五十兩鈔五百錠又敕春曰思倫發窮而歸我當以兵送還若至雲南先遣人往諭榦孟毋怙終不臣必歸而王倘其不從則聲罪以討之時刀榦孟旣逐思倫發亦懼朝廷加兵乃遣人詣西平侯請入貢春以聞三十一年春奏榦孟欲假朝廷威以拒忽都其言入貢未可信帝遣人諭春曰遠蠻詭

詐誠有之姑從所請審度其宜毋失事機五月春以兵送思倫發於金齒使人諭刀榦孟榦孟果不從遣左軍都督何福瞿能等將兵五千討之踰高良公山直搗南甸大破之殺刀名孟斬獲甚衆回兵擊景罕寨寨憑高據險堅守不下官軍糧械俱盡賊勢益張福使告急於春春率五百騎往救乘夜至怒江詰旦渡率騎馳鬪揚塵蔽天賊不意大軍至驚懼遂破之乘勝擊崆峒寨賊夜潰刀榦孟遣人乞降事聞朝廷以其狡詐命春俟變討之春尋病卒刀榦孟竟不降又命都督何福往討未幾擒刀榦孟歸思倫發始還平緬踰年卒永樂元年思倫發子散朋來朝貢馬賜絨錦織金文綺紗羅并儻從鈔有差二年三月遣內官張勤等頒賜麓川四月麓川平

緬木邦孟養俱遣人來貢各賜之鈔幣時麓川平緬宣慰使思行發所遣頭目刀門賴訴孟養木邦數侵其地禮部請以孟養木邦朝貢使付法司正其罪帝謂蠻衆攻奪常事執一二人罪之不足以革其俗且曲直未明而遽罪其使失遠人心今西平侯論之五月遣員外郎左緝使八百國并使賜麓川平緬宣慰冠帶襲衣五年麓川平緬所隸孟外頭目刀發孟來朝貢象及金器賜鈔幣九月散朋貢馬賜鈔及文綺紗羅六年思行發貢馬方物謝賜金牌信符恩黔國公沐晟言麓川平緬所隸孟外陶孟土官刀發孟之地爲頭目刀薛孟侵據請命思行發論刀薛孟歸侵地從之七年思行發來貢遣中官雲仙等齎敕賜思行發金織文綺紗羅至麓川思行發失郊迎禮仙責之思行發惶懼九年遣刀門奈來貢謝罪乞赦過帝貸之仍命宴勞其使并遣賜思行發文錦金織紵絲紗羅十一年思行發請以其弟思任發代職從之思任發遣頭目刀弄發貢象六馬百匹及金銀器皿等物謝恩二十一年思任發遣使奉表來貢并謝傳南甸州罪遣中官雲仙齎賜并敕戒之洪熙元年遣內官段忠徐亮以卽位詔諭麓川宣德元年遣使諭西南夷賜麓川錦綺有差以其勤修職貢也時麓川木邦互相爭界各訴於朝就令使者論解之俾安分毋侵越黔國公沐晟奏麓川所屬思陀甸火頭曲比爲亂請發兵討帝命姑撫之置麓川平緬宣慰司所轄大店地驛丞一員以土人刀捧怯爲之從官慰刀暗發奏也三年雲南



三司奏麓川宣慰使思任發奪南甸州等處屬地請發兵問罪帝命晟同三司巡按詳計以聞敕任發保境安民以承先業不宜侵犯鄰疆殘殺人民陷逆以滋罪咎晟以思任發侵奪南甸騰衝之罪不可宥請發官軍五萬及諸土兵討之帝以交陞四川方用兵民勞未息宜再行招諭不得已其調雲南官軍土軍及木邦宣慰諸緜兵勦之八年遣內官雲仙齋敕至麓川賜思任發紵絲紗羅緞錦諭其勿與木邦爭地仇殺正統元年免麓川平緬軍以宣慰司所欠差發銀二千五百兩以思任發奏其地為木邦所侵百姓希少無從辦納部執不可帝特蠲之初洪武間平雲南惟百夷部長思倫發未服後為頭目刀幹蓋所逐思京陳訴命為宣慰回居麓

川分其地設孟養木邦孟定三府隸雲南設潞江干崖大侯蠻甸四長官司隸金齒永樂元年陞孟養木邦為宣慰司孟養宣慰刀木且與其鄰境仇殺而死緬甸乘機併其地未幾緬甸宣慰新斯加又為木邦宣慰所殺是時思倫發已死其長子思行發襲父職亦死次子思任發襲兄職為麓川宣慰狡獪踰於父兄差發金銀不以時納朝廷稍優容之適會緬甸之危思任發侵有其地遂欲盡復其父故所失地稱兵擾邊侵孟定府及灣甸等州殺掠人民而南甸知州刀貢罕亦奏麓川奪其所轄羅卜思莊等二百七十八村於是晟奏思任發連年累侵孟定南甸干崖騰衝潞江金齒等處自立頭目刀珍罕土官早亨等相助為暴叛形已著近又親率蠻寇

侵及金齒勢已猖獗在所必誅已遣諸衛馬步官軍至金齒守備乞調大兵進討朝命選將廷舉右都督方政都督僉事張榮往雲南協同鎮守右都督昂率兵討之思任發方修貢冀緩師而晟遽信其降無渡江意任發乃遣其所部衆萬餘奪潞江沿江造船三百艘欲取雲龍又殺死甸順江東等處軍餘殆盡帝以賊勢日甚責晟等玩寇養患政亦至軍欲出戰晟不可政造舟欲濟師晟又不許政不勝憤乃獨率其麾下與賊將緬簡戰破賊舊大寨賊奔景罕指揮唐清復擊破之又追敗之高黎共山下共斬三千餘級乘勝深入逼思任發上江上江賊重地也政遠攻疲甚求援於晟晟怒其違節制渡江不遣久之以少兵往至夾象石又不進政追至空泥

知晟不救賊出象陣衝擊軍殲政死焉晟聞敗乃請益軍帝遣使者責狀仍調湖廣官軍三萬一千五百人貴州一萬人四川八千五百人令吳亮馬翔統之至雲南聽晟節制仍救晟豫籌糧糈而晟懼罪暴卒時思任發兵愈橫犯景東剽孟定殺大侯知州刀奉漢等千餘人破孟賴諸寨孟連長官司諸處皆降之思任發仍遣人以象馬金銀來修貢復致番書於雲南總兵官謂始因潞江安撫線舊法邀已報仇其後線舊法乃誣已爲入寇致大軍壓境惶恐無地今欲遣使謝罪乞爲導奏帝降敕許赦其罪時刑部侍郎何文淵疏請罷麓川師命下廷臣議於是行在兵部尙書王驥及英國公張輔等皆以爲麓川負恩怙惡在所必誅須更選將練兵以昭天

討如思任發果自悔禍縛詣軍門生全之恩取自上裁帝然之已而侍講劉球復以息兵請如文淵旨部覆以麓川之征已有成命報聞六年二月以定西伯蔣貴爲平蠻將軍都督李安劉聚副之而以兵部尙書王驥總督雲南軍務大會諸道兵十五萬討之時思任發遣賊將刀令道等十二人率衆三萬餘象八十隻抵大侯州欲奪景東威遠十月驥將抵金齒思任發遣人乞降驥受之而令諸將分道入右參將冉保從東路攻細甸灣甸水寨入鎮康趨孟定驥與貴由中路至上江會騰衝左參將宮聚自下江據夾象石至期合攻之賊拒守嚴銃弩飛石交下如雨次日乘風焚其柵火竟夜不息官軍力戰拔其上江寨斬刀放戛父子擒刀孟項前後斬馘

五萬餘以捷聞七年驥率兵渡下江通高黎貢山道至騰衝留都督李安領兵提備驥由南甸至羅卜思莊前軍抵於木籠時思任發率其衆二萬餘據高山立硬寨連環七營首尾相應驥遣宮聚劉聚分左右翼緣嶺上驥將中軍橫擊之賊遁軍進馬鞍山擣賊寨寨兩面距江壁立周迴三十里皆立柵開塹軍不可進而賊從間道潛師出馬鞍山後驥戒中軍毋動而命指揮方瑛率精騎六千突入賊寨斬首數百級復誘敗其象陣而從東路者合木邦人馬招降孟通諸寨元江同知杜凱等亦率車里及大侯蠻兵五萬招降孟璉長官司并攻破烏木弄戛邦等寨斬首二千三百餘級齊集麓川守西峨渡就通木邦信息百道環攻復縱火焚其營賊死不可

勝數思任發父子三人并挈其妻孥數人從間道渡江奔孟  
養獲原給虎符金牌信符宣慰司印及所掠騰衝千戶等印  
三十二麓川平捷關命還師時思任發敗走孟蒙復爲永邦  
宣慰所擊追過金沙江走孟廣緬甸宣慰卜刺當亦起兵攻  
之帝命木邦緬甸能効命擒任發獻者卽以麓川地予之未  
幾思任發爲緬人擒緬人挾之求地其子思機發窮困乞來  
朝謝罪先遣其弟招賽入貢帝命遣還雲南安置思機發窺  
大兵歸圖恢復據麓川出兵侵擾於是復命總督王驥率定  
西侯蔣貴等統大軍再征麓川驥率師至金齒思機發遣頭  
目刀籠肘偕其子詣軍門求降驥遣人至緬甸索思任發緬  
甸諾不遣驥至騰衝與蔣貴沐昂分五營進緬人亦聚衆待

驥欲乘大師攻之見其衆盛未易拔又恐多一麓川敵乃宣  
言犒師而命貴潛焚其舟數百艘進師薄之緬甸堅執前詔  
必予地乃出思任發復詭以思機發致仇爲解驥亦無如何  
乃趨者藍搗思機發巢破之思機發脫走俘其妻子部衆立  
隴川宣撫司而歸時思機發竊據孟養負固不服自如也十  
一年緬甸始以思任發及其妻孥三十二人獻至雲南思任  
發於道中不食垂死千戶王政斬之函首京師其子思機發  
屢乞降遣頭目刀孟永等修朝貢獻金銀言蒙朝廷調兵征  
討無地逃死乞貸餘生詞甚哀帝命受其貢因敕總兵官沐  
斌及參贊軍務侍郎楊寧等以朝廷旣貸思機發以不死其  
經畫善後長策以聞并賜敕諭思機發十二年總兵官黔國

公沐斌奏臣遣千戶明庸齎敕招諭麓川思機發以前所遣弟招賽及子哀準俱不歸懷疑懼不敢出近緬甸以思機發掠其牛馬金銀欲進兵攻取臣等議遣人分諭木邦緬甸諸宣慰司令集蠻兵刻期過江分道討臣等率官軍萬人駐騰衝以助其勢使賊四面受敵必成擒矣從之已命授思機發弟招賽爲頭目給冠帶月糧房屋隸錦衣衛其從人俱令於馴象所供役先是居招賽於雲南其黨有欲稱亂者乃命招賽來京且冀以招徠思機發也帝旣命雲南出兵勦思機發及沐斌等至騰衝督諸軍追捕思機發終不出潛匿孟養遣其徒來貢許以恩貸復不至斌以春瘴作江漲不可渡糧亦乏引兵還帝以斌師出無功復命兵部尚書靖遠伯王驥總

督軍務都督同知宮聚佩平蠻將軍印率南京雲南湖廣四川貴州官軍土軍十三萬人往討之至是驥凡三征麓川矣帝密諭驥曰萬一思機發遠遁則先擒刀變蠻平其巢穴或遁入緬地而緬人黨蔽亦相機擒之庶蠻衆知懼大軍不爲徒出又敕諭斌軍事悉與驥會議而行又敕諭木邦緬甸南甸于崖隴川等宣慰使罕蓋發等各整兵備船積糧以俟調度十四年驥率諸將自騰衝會師出于崖造舟至南牙山舍舟陸行抵沙壩復造舟至金沙江思機發於西岸理柵拒守大軍順流下至管屯適木邦緬甸二宣慰兵十餘萬亦列於沿江兩岸緬甸備舟二百餘爲浮梁濟師併力攻破其柵寨得積穀四十萬餘石軍飽銳氣增倍賊領衆至鬼哭山築大

寨於兩峰上築二寨爲兩翼又築七小寨綿亘百餘里官軍分道竝進皆攻拔之斬獲無算而思機發思卜發復奔遁時王師踰孟養至孟那孟養在金沙江西去麓川千餘里諸部皆震讐曰自古漢人無渡金沙江者今王師至此直天威也驥還兵其部衆復擁思任發少子祿據孟養地爲亂驥等慮師老度賊不可滅乃與思祿約許以土目得部勒諸蠻居孟養如故立石金沙江爲界誓曰石爛江枯爾乃得渡思祿亦懼聽命乃班師捷聞帝爲告廟云景泰元年雲南總兵官沐璘奏緬甸宣慰已擒獲思機發又將思卜發放歸孟養恐緬人復挾爲奇貨不若緩之聽其自獻便從之五年緬人索舊地左參將胡誌等論以銀戛等處地方與之於是乃送思機

發及其妻孥六人至金沙江村誌等檻送京師南寧伯毛福壽以聞八月誅思機發於京師七年思任發子思卜發奏臣父兄犯法時臣幼無知今不敢如父兄所爲甚畏朝廷法謹備差發銀五百兩象三馬六及方物等遣使人入貢惟天皇帝主哀憐因賜救戒諭并資思卜發與妻錦紵絲紗羅等及其使鈔幣有差成化元年總兵官沐瓚等以思任發之孫思命發至京師乃逆賊遺孽不可留請發沿海登州衛安置月給米二石從之麓川先是麓川之初平也分其地立隴川宣撫使司因以恭項爲宣撫使恭項者故麓川部長首先歸順効力有功因命於麓川故地開設宣撫已而頭目曩渙等復來歸願捕賊自効帝命還守本土有功卽加敘諸凡來歸

者視此例遂以刀歪孟爲本司同知刀落曩爲副使隴帝爲僉事俱賜冠帶從宜撫恭項推舉也恭項之子恭立來朝貢命給賜如例并授恭立爲長史未幾隴川宣撫失印請再給帝責恭項以不能宣揚國威反自行失印罪應不宥姑從寬再頒給時板蹇據者藍寨侵擾隴川百夫長刀門線刀木立進兵圍之斬板蹇等及其子弟二十三人命賜有功者皆爲冠帶把事并資金織文綺正統十一年木邦宣慰罕蓋法來求麓川故地有司以已設隴川宣撫司建官分管矣其以孟止地予之報可十二年敕諭恭項言比者總兵奏爾與百夫長刀木立相仇殺人民懷怨欲謀害爾父子今遷爾於雲南俾不失所且遣官護爾家屬完聚其體憫恤無懷疑懼旣而

總兵官言隴川致亂皆由恭項暴殺無辜刻虐蠻人同知刀歪孟爲蠻衆信服乞安置項於別衛而以刀歪孟代理帝以恭項來歸屈法宥之命於曲靖安置并遣敕往諭景泰七年隴川宣撫多外悶遣人貢象馬及金銀器皿方物賜綵幣表裏襲衣如例仍命齋敕賜之時多外悶初修朝貢故也成化十九年以隴川宣撫司宣撫多歪孟子亨法代職初隴川與木邦地界相鄰旣以爭地故仇殺數十年構兵不息屢詔撫諭之亦不悛嘉靖中土舍多鯨于刃其母兄自襲而奪之印下鎮巡官按問伏辜聽還職兄子多參詔貫其罪并戒木邦罕孟毋得復黨鯨爭職萬曆初緬甸莽瑞體叛來招隴川宣撫多士寧士寧不從其記室岳鳳者江西撫州人黠而多智

商於隴川士寧大信任之妻以妹鳳曲媼士寧陰奪其權與  
三宣六慰各土舍罕拔等歃血盟誘士寧往擺古歸附緬酋  
而陰使其子曩烏鳩殺士寧并殺士寧妻女奪其印信勘合  
投緬因受緬僞命代士寧爲宣撫及瑞體死子應裏嗣鳳父  
子臣服之誘賂官軍獻士寧母胡氏及親族六百餘人於應  
裏盡殺之多氏之宗幾盡初鳳之附於緬也爲瑞體招諸部  
拒中國傷害官軍逆勢浸成緬亦倚之如左右手久之悔緬  
不足恃而鄧川土知州何鳳友婿也初使人招之鳳執其  
使獻於緬及是復開示百方與之盟誓當是時官軍亦大  
集諸將劉綎鄧子龍各率勁師至環壁四面鳳懼乃令妻子  
及部曲來降綎責令獻金牌符印及蠻莫猛密地乃以送鳳

妻子還隴川爲名分兵趨沙木籠山先據其險而自領大兵  
馳入隴川鳳度無可脫遂詣軍門降綎復率兵進緬緬將先  
遁留少兵隴川綎攻之鳳子曩烏亦降綎乃攜鳳父子往攻  
蠻莫蠻莫賊知鳳降馳報應裏將發兵再圍隴川綎乘勝掄  
殺賊窘乞降縛緬人及象馬來獻遂招撫孟養賊賊將乘象  
走追獲之復移師圍孟臉生擒其魁隴川平獻俘於朝帝爲  
告謝郊廟時萬曆之十二年九月也踰年春復鑄隴川宣撫  
司及孟定府印陞孟密安撫爲宣撫司添設安撫司二曰蠻  
莫曰耿馬長官司二曰孟臉曰孟養千戶所二一居姚關一  
居猛淋砦皆名之曰鎮安並鑄印記建大將行署於蠻莫從  
雲南巡撫劉世曾之議也於是多士寧之子思順襲隴川宣



撫使二十九年莽應裏分道入犯一入遮放芒市一入臘撒  
蠻額一入杉木籠竝出隴川多思順不敵奔猛卯緬初以猛  
卯同知多俺爲嚮導寇東路至是大軍遣木邦罕欽擒多俺  
殺之未幾思順死蠻莫思正乘喪襲隴川據其妻罕氏三十  
五年思順子安民以守將索賂叛入緬已而緬聽撫遣安民  
歸安民久據蠻灣築寨甚署永騰參將周會遣二指揮襲之  
敗績王師亟討其族人挾其弟多安靖誅之以獻時安靖尚  
幼勢孤詔俟其長給之印安民弟安邦治亦附緬歸順後寄  
居蠻莫其地有馬安摩黎羅木等山極險峻麓川之所恃爲  
巢穴者也

明史藁

列傳第一百八十八終

明史藁

列傳第一百八十九

光祿大夫 經筵講官明史總裁戶部尙書加七級臣王鴻緒奉

敕編撰

雲南土司三

緬甸 二宣慰司 于崖 宣撫

潞江

南甸 二宣撫司 芒市 者樂甸

茶山 孟連 卽益臉 里麻

鈕兀 東倘 瓦甸

促瓦 散金 木邦附孟密安撫司

孟養 車里 老撾

八百 一宣慰司

緬甸在雲南極邊地古未通中國其部落有五城元至元中  
屢討之乃歸附後於蒲甘緬王城置邦牙等處宣慰使司太  
祖初卽位遣使諭之不能達而返二十六年三月八百國使  
人洪都入貢因言緬國近其邊以地遠不能自達帝乃令西  
平侯沐春遣使至八百國王所諭意於是緬國始遣其臣  
南速刺至進方物命宴勞之賜綺帛有差二十七年六月置  
緬中宣慰使司以土官卜刺浪爲宣慰使賜其使二十人鈔  
錠羅綺布匹有差二十八年緬國卜刺浪遣使桑乞刺查朝  
貢方物因言百夷思倫發屢出兵侵奪其境土命遣使諭之  
二十九年緬國復來訴因遣行人李思聰錢古訓諭緬及百  
夷各罷兵守土緬國聞命思倫發亦奉詔罷兵適百夷部長

刀幹孟叛逐思倫發以故事得已永樂元年緬甸頭目那羅  
增遣其屬郎尋塞來朝貢方物初西平侯沐晟遣鎮撫鄧伯  
通等撫諭之至是來朝且言緬雖遐裔悉願臣屬中國而道  
經木邦孟養多爲阻遏乞命以職賜冠服印章將來憑仗天  
威歲効職貢庶免欺陵帝命設緬甸宣慰使司以那羅增爲  
宣慰使遣使賜冠帶印章二年三月遣內官張勤頒賜緬甸  
四月緬甸遣人來貢五月遣員外郎左洋使八百國并賜緬  
甸冠帶襲衣五年四月緬甸土官那羅增等遣其屬洛霞等  
詣闕貢方物謝罪先是孟養宣慰使刀木口與戛里相仇殺  
而那羅增乘釁發兵劫之殺刀木口及其長子思樂發掠其  
人口牛馬遂據其地事聞詔行人張洪等齎敕諭責之那羅

增懼遂歸其境土及所掠遣人詣闕謝帝諭禮部曰蠻既服  
辜其釋不問仍給以信符令三年一朝貢初卜刺浪分其地  
使長子那羅增管大甸次子馬者速管小甸卜刺浪死那羅  
增盡收馬者速土地人民馬者速往依速覩嵩土官板洋為  
贅婿至是復居小甸遣人來朝且訴其情敕諭那羅增兄弟  
和好如初母于天討六年五月緬甸宣慰使那羅增等遣頭  
目洛霞等貢馬方物謝罪并謝賜金牌信符恩皆予賜七年  
那羅增使來復遣中官雲仙等齋救賜以金織文綺紗羅如  
麓川十二年那羅增遣刺牙詣闕言為木邦所侵掠帝以那  
羅增素強橫遣人諭之使修好鄰境各守疆界洪熙元年遣  
內官段忠徐亮以即位詔諭緬甸宣德元年遣使往諭雲南

土官賜緬甸錦綺有差二年以緬甸大頭目莽得刺為緬甸  
宣慰使初緬甸宣慰使新加斯與木邦仇殺而死子弟皆潰  
散緬甸頭目耆老共推莽得刺權理請襲許之八年莽得刺  
遣人來貢遣內官雲仙齋救賜之并諭其保境勿侵木邦地  
正統六年給緬甸信符金牌各一時麓川思任發叛將討之  
命緬甸調兵待七年思任發兵敗過金沙江走孟廣緬甸宣  
慰卜刺當起兵夾攻之帝諭木邦緬甸能擒賊首獻者予以  
麓川地八年總督尚書王驥奏緬甸宣慰使馬哈省以速刺  
等稱已擒獲思任發比覽緬書切切以麓川分地為言臣以  
論功行賞自國家成憲已諭其將思任發解京恩賞自不爾  
吝也時緬甸已囚思任發於阿瓦城思任發之子思機發復

據麓川爲亂勢復熾緬甸恐獻思任發未必得地徒爲思機發所仇屢檄不報欲大軍殺思機發分地乃出思任發朝命遂有并征緬甸之論是時大師已集騰衝緬甸宣慰遣人致書期以今冬會木邦人馬送思任發至貢章交官軍驥與剋期遣指揮李儀等領精兵爲前鋒通南牙山路擣貢章而緬人獻思任發者竟不至九年驥駐師江上而緬用大金樓船載賊渠往來江上覘官軍虛實驥知緬終不肯出賊且以麓川未平緬難不可復作乃率總兵官蔣貴等潛焚其舟數百緬人潰驥乃班師於是總兵官沐昂奏緬甸恃其僻險黨蔽逆賊應加兵恐煩師衆滇方連年征進財力困弊旱澇相仍糧餉亦匱未可輕舉臣已遣人諭緬禍福俾獻賊首緬宜聽

從十一年木邦宣慰罕蓋法緬甸故宣慰子馬哈省以速刺遣刀路猛等偕千戶王政等獻思任發首及諸俘馘至京并貢金銀什器象牙土錦等物帝命馬哈省以速刺爲宣慰使賜路猛等宴并綵幣有差俾齎敕及綵幣褒賜兩宣慰仍給賜馬哈省以速刺冠帶印信未幾以速刺奏求孟養戛里地且請大軍亟滅思機發兄弟而已出兵爲助帝諭以思機發可不戰擒宜卽滅賊以來分地勿爲他人得也景泰二年八月賜緬甸宣慰使陰文金牌信符時緬甸宣慰以速刺已擒獲思機發久不卽獻又將思卜發放回孟養至是來索地左參將胡誌遣人以銀夏等處地方與之乃送思機發及其妻孥至金沙江歸於誌獻京師帝以思卜發旣遠遁不必窮追

仍加賞錦綺綵幣降敕褒獎成化七年鎮守錢能奏緬甸宣慰奏稱貢章孟養二地舊爲所轄欲爭據之尋奉旨往勘貢章係木邦隴川分治孟養係思洪發所掌非緬甸地難從所請令雲南守臣傳飭諸部而緬甸以所求孟養貢章地不許復執奏許地乃前朝明旨而貢章乃緬甸朝貢駐泊必由之途乞與緬甸又以金齒軍餘李讓乞令爲冠帶把事以備任使兵部尚書余子俊等以爲思洪發不聞有過豈可奪其土地李讓中國人而與爲把事亦非體宜勿許帝命兵部諭其使以朝廷一視同仁無間遠邇凡經赦不再犯者俱不復治孟養貢章是爾朝貢所由當飭邊臣往諭思洪發以通道往來不得阻遏李讓聽該管官司專遣其體朕意勿復多望弘

治元年緬甸來貢且言安南侵其邊境二年遣編修劉箴論安南罷兵然緬地鄰孟養而孟養以緬先執思任發於朝也故怨緬嘉靖初思陸丁思倫糾木邦及孟密擊破緬殺宣慰莽紀歲并其妻子分據其地緬甸訴於朝不報六年始命永昌知府嚴時泰衛指揮王訓往勘思倫夜縱兵鼓譟焚驛舍殺齋金牌千戶曹義時泰倉皇遁乃別立土舍莽卜信守之而去備安鳳之亂不暇究其事莽紀歲有子名瑞體少奔匿洞吾母家其酋養爲已子既長有其地洞吾之南有古喇濱海與佛郎機鄰古喇酋兄弟爭立瑞體和解之因德瑞體爭割馬革地爲獻受其約束號瑞體爲噠喇瑞體乃舉衆絕古喇糧道殺其兄弟盡奪其地諸蠻皆畏服之當是時滅緬者

木邦孟養而與緬相抗者孟密也孟密思漢子嫡庶紛爭訴於瑞體瑞體乃納思漢子思琢爲婿改名思忠遣歸孟密而奪其兄思宋印因假途攻孟養及迤西諸蠻以復前仇又使其黨卓吉侵奪孟養境後卓吉爲思眞婿猛乃頭目別混所殺瑞體怒自將攻別混父子擒之仍招致隴川干崖南甸諸土官欲入寇旣覘知有備又慮他蠻襲其後乃遁歸於是鎮巡官沐朝弼等上其事兵部覆荒服之外治以不治噓喇已畏威遠遁傳諭諸蠻不許交通結納詔可時嘉靖之三十九年也時木邦土舍罕拔求襲不得怒投於緬潞江宣撫線貴聞之亦入緬瑞體自以起孤微有兵衆威加諸部而中國復禁絕之遂萌自王之志日窺中國虛實謀內侵乃命線貴趣

召隴川多士寧士寧聚兵爲堆言中國廣大誠勿妄動瑞體意稍寢未幾士寧爲其下岳鳳所殺干崖宣撫刀怕舉亦死罕拔乃請瑞體入干崖干崖舉則隴川可坐定也瑞體子應裏桀黠多智言於瑞體曰隴川干崖雖無王遠難猝取孟養思箇近在肘腋又吾世仇萬一乘虛順流下禍不淺瑞體深然之因借木邦兵一萬取干崖而自率兵侵孟養旣至屢爲思箇所敗思箇亦退保孟倫相持久而隴川書記岳鳳欺其主幼私齎重賂投緬結爲父子蠻莫土目思哲亦迎附瑞體乃調緬兵萬餘出入於迤西界上以牽制思箇復徵木邦罕拔兵會岳鳳於隴川襲孟密萬曆元年緬兵至隴川入之岳鳳遂盡殺士寧妻子族屬受緬僞命據隴川爲宣撫乃與罕

拔思哲盟必執思澤下孟密奉瑞體以拒中國偽爲錦囊象  
函貝葉緬文稱西南金樓白象王莽噠喇弄王書報天皇帝  
書中嫚辭不忍聞等拔又爲緬招干崖許刀怕文代襲其兄  
職怕文拒之與戰適瑞體遣子應裏率賊二十萬分戍隴干  
間以其兵驟臨之怕文潰奔永昌遂取干崖印付拔妹罕氏  
以女官攝宣撫臣緬而召蓋達副使刀思管雷弄經歷廖元  
相佐之同守干崖以防中國於是木邦蠻莫隴川干崖諸蠻  
俱已附緬獨孟養未下金騰副使許天琦遣指揮侯度持檄  
招諭孟養思箇受檄益拒緬緬大發兵攻之思箇告急會天  
琦卒署事副使羅汝芳受事犒思箇使令先歸待援且許以  
世襲遂調漢土兵馬躡至騰越思箇聞援兵至喜令土目烏

祿喇送等領萬餘兵絕緬糧道於阿瓦寨且導大兵伏夏撒  
誘緬兵深入截其歸路自率蠻卒衝其前而令援兵自隴川  
尾擊之緬兵旣大敗又糧絕屠象馬餉兵不給死者山積瑞  
體窘甚會有陳於巡撫言生事不便者巡撫王凝立馳止之  
汝芳聞檄忿甚然無可如何思箇待援不至岳鳳偵知之集  
隴川兵二千兼程進導瑞體由間道遁去思箇追擊之緬兵  
大傷當是時幾獲瑞體六年廷議遣使至孟養俾還所俘緬  
兵象并資以金帛好言慰諭之瑞體不謝七年永昌千戶辛  
鳳奉使買象於孟密思忠執鳳送緬緬遣回是年緬復攻孟  
養報夏撒之怨思箇以無援敗奔將之騰越中途爲其下所  
執送瑞體殺之盡并孟養地八年巡撫饒仁侃遣人招緬緬

不應十年岳鳳領緬兵襲破干崖奪罕氏印俘之俄瑞體死子應裏嗣岳鳳嗾應裏殺罕拔盡俘其眾歸緬鳳又說應裏以大兵壓境自赴參谷起象兵數十萬分道內侵於是時雷弄盞達南甸干崖木邦老姚思甸皆為所破十一年焚掠施甸寇順寧鳳子曩烏領眾六萬突至孟淋寨指揮吳繼勳與千戶祁維垣死之又破盞達副使刀思定求救不得城破妻子族屬皆盡且窺騰衝永昌大理蒙化景東鎮沅諸郡巡撫劉世曾請以南京坐營中軍劉綎為騰越遊擊移武靖參將鄧子龍為永昌參將各提兵五千赴勦并調諸土軍應援緬亦合兵聚姚關綎與子龍大破之於攀枝花地乘勝追擊自十年十月至十一年四月斬首萬餘復率兵出隴川孟密直

抵阿瓦緬酋猛勾詣綎降勾瑞體弟也應裏乃以子思斗守阿瓦是時岳鳳知緬勢不足恃而大軍環攻之勢危急遂降伏死京師詳隴川傳時諸部蠻多視鳳為向背緬亦倚鳳為心腹鳳既降諸部俱殺緬使來歸既聞鳳擒被誅諸部旋復解散陰附於緬應裏復披猖攻孟養蠻莫聲言復仇時副使李材備兵騰衝遣兵援之戰於遮浪大破其象陣生擒五千餘人先是猛哈思化投緬復進據蠻莫材遣人招之思化降十九年應裏復率緬兵圍蠻莫思化告急時天暑官軍行不前裨將萬國春夜馳至多設火炬為疑兵緬人退追敗其眾二十二年巡撫陳用賓築八關於騰衝列兵留戍募人至暹羅約夾攻緬緬初以猛卯多俺為嚮導寇東路至是遣木邦



罕欽擒多俺殺之遂築平麓於猛卯大興屯田是年緬帥思仁寇蠻莫敗之斬其渠丙測二十三年十二月應裏託孟璉孟良二土司求朝貢致方物鎮巡以聞朝議令原差官黎景桂等齎銀幣賜之至境不受詔以緬酋貢獻原無有葉文專使景桂首事貪功納侮下於理三十一年阿瓦雍罕木邦罕拔子罕禧俱入貢緬勢頓衰而暹羅得楞復連歲攻緬殺緬長子莽機擲古喇殘破自此不敢內犯然諸近緬部先後附緬如初至崇禎末蠻莫思縣為緬屬守曩木河明叵黔國公沐天波等走蠻莫思縣使告緬緬使人迎之且傳語述萬曆時事并出神宗璽書索今篆合之以為偽天波出已先所頒印相比無差始服蓋自天啓後緬絕貢職至此無可考驗云

干崖舊名干賴巖蠻人居之東北接南甸西接隴川有平川衆岡境內甚熱四時皆蠶以其絲織五色土錦充貢元中統初內附至元中置鎮西路軍民總管府領三甸洪武十五年改鎮西府永樂元年正月設干崖長官司二年頒給信符金字紅牌於干崖并賜冠服三年干崖長官司長官曩歡遣頭目奉表貢馬犀象金銀器皿謝恩賜鈔幣五年設古刺驛隸金齒干崖長官司長官曩歡遣子刀思曩來朝貢象馬金銀器皿方物賜賚如例自是三年每來朝貢不絕宣德六年改干崖長官司隸雲南都司時長官刀弄孟奏乞援大侯長官司例陞干崖為州又奏其地近雲南都司而歲納差發銀於金齒衛路遠乞改隸雲南都司而輸銀於布政司為便帝問

吏部大侯何以陞州對曰以歲納差發銀多故陞帝以祖宗設置已定不可易但可改隸雲南都司及納銀於布政司以便之正統三年命干崖長官司仍隸金齒軍民指揮使司六年陞干崖副長官刀怕便爲長官司賜綵幣六表裏初怕便爲思任發所拘脫身歸順其家屬又皆被害後屢立功總兵官沐昂請褒恤之故有是命九年陞干崖長官司爲干崖宣撫司以長官刀怕便爲宣撫副長官劉英爲同知從總督王驥請也天順二年命故土官同知劉英子晟襲職陞刀思忠爲干崖宣撫司副使弘治三年干崖土舍刀怕愈欺其姪刀怕落幼將謀奪宗蠻衆不服遂起兵相攻劫去宣撫司印者四年按察司副使林俊因他事過其地知之遂同參將沐謙

等移文往諭始釋兵歸印事聞帝責鎮巡官不以特奏報宜罪姑宥七年時議征木邦命干崖預爲兵備既思陸兵至遂取道干崖而還嘉靖三十九年緬甸莽瑞體執招干崖諸土官入寇旣干崖復與南甸木邦相仇殺萬曆初宣撫刀怕舉死木邦遂引緬兵入干崖怕舉妻罕氏木邦宣慰罕拔妹也拔旣叛附緬因召怕舉弟怕文令襲兄職以臣緬且以妹許之怕文不受與戰緬兵十萬驟臨怕文潰奔永昌罕拔遂取干崖印付罕氏而名蓋達副使刀思管雷弄經歷廖元同守干崖十年隴川岳鳳領緬兵襲破干崖奪土婦罕氏印俘之十一年游擊劉綬破隴川鳳乞降綬責追干崖印已印竟不得而干崖部衆自相承代亦莫得而考云

潞江地在永昌騰越之間南負高崙山北臨潞江爲官道咽喉地多瘴癘蠻名怒江甸至元間隸柔遠路永樂元年內附設潞江長官司其地舊屬麓川平緬西平侯奏其地廣人稠宜設長官司治之二年頒給信符及金字紅牌於潞江九年潞江長官司曩璧遣子維羅法貢馬方物賜鈔幣尋陞潞江爲安撫司是年潞江安撫曩璧來朝貢象馬金銀器謝恩賜鈔幣遣還宣德元年六月曩璧遣子刀門法來朝貢馬以潞江安撫司隸雲南布政司初潞江與灣甸同爲長官司屬金齒永樂間陞灣甸爲州隸雲南布政司潞江亦陞爲安撫司仍屬金齒至是曩璧遣子入貢奏乞改隸爲便故有是命九月遣中官雲仙齎敕及綺幣賜曩璧三年黔國公沐晟奏潞

江千夫長刀不浪班叛歸麓川聚衆攻劫潞江安撫司逐安撫曩璧入金齒殺招剛因達硬等七人劫奪財物焚毀民居又據潞江驛逐驛丞周禮立寨固守斷絕道路蒲欒阿昌諸蠻與之接境慮相煽爲亂請發兵討之帝敕晟與三司熟計之五年晟奏刀不浪班已懼罪盡還其所據地復歸舊部輸役如故乞因而撫之報可是年置雲南廣邑州時中官雲仙還自雲南言金齒廣邑寨本永昌副千戶阿干所居干嘗奉朝命招生蒲五千戶向化今干孫阿都魯同蒲酋莽塞叔阿類詣京貢方物且乞於廣邑置州使阿都魯代已掌州事以熟蒲并所招生蒲屬之兵部請勘實帝曰地在邊遠不必復勘悉從之遂以阿都魯爲廣邑州知州莽塞爲同知命禮部

鑄印給之八年改金齒永昌千戶所爲潞江州隸雲南布政司以千夫長刀珍罕爲知州刀不浪班爲同知置潞江州吏目一員本州清水關巡檢一員正統三年改潞江安撫司仍隸金齒軍民指揮使司潞江州百夫長仍還永昌千戶所潞江州知州刀珍罕同知刀不浪班仍充千夫長從黔國公晟奏也又革非額新設諸巡檢司五年麓川叛寇思任發致番書於雲南總兵官言始因潞江安撫司線舊法邀已以報仇其後線舊法乃誣已爲入寇帝以麓川素行侵奪潞江孟養諸鄰今反歸罪以卸過因諭潞江守邊屬兵以俟征討景泰七年敕諭潞江安撫司線舊法賜綵幣表裏并及其妻命來使線貫等齎回旣麓川遣部衆奪據潞江殺傷官軍潞江遂

爲麓川所剽劫正德十六年潞江安撫司土官安捧奪其從弟掩莊寨二十八所掩屢訟於官不報捧遂集蠻兵圍掩寨縱火屠掠掩母子妻妾及蠻民男婦死者八十餘人因據有其地鎮巡聞狀乃統官軍誘執之捧尋死於獄帝命仍戮屍棄市其子詔及黨與皆斬天啓間有線世祿者繼襲安撫

南甸宣撫司舊名南宋在騰越南半箇山下其山巔北多霜雪南則炎瘴如丞元置南甸路軍民總管府領三甸洪武十五年改南甸府永樂十一年改南甸州隸布政司宣德三年雲南三司奏麓川占奪南甸州地請發兵問罪帝爲特敕思機發旣黔國公沐晟亦以爲言帝仍不許加兵五年六月南甸州奏先被麓川宣慰司奪其地賴朝廷威力復之若不置

官司以正疆界恐侵奪未厭乞於木縛雷傍哈丘隴磨孟倫  
四處置巡檢司以鎮之帝命吏部除官八年南甸州又奏其  
州與麓川接境舊二百夫長在騰衝千戶所時賴邦哈等  
處亦令軍民兼守後麓川宣慰侵據本州境土不守者十餘  
年今蒙朝廷收諭麓川還所侵地竊恐再見侵據又慮百姓  
逃移乞於本州賴邦哈九浪莽孟洞三處各置巡檢司以上  
軍楊義趙德趙榮三人爲巡檢命下三司覆勘成奏爲宜遂  
悉授之正統二年土官知州刀貢罕奏麓川思任發奪其所  
轄羅卜思莊地二百七十八村乞朝廷遣使齎金牌信符諭  
之俾退還所侵地帝敕黔國公沐晟處置奏聞九年陞南甸  
州爲南甸宣撫司以南甸州知州刀落硬爲宣撫通判劉思

勉爲同知先是總督王驥奏南甸宜設宣撫司撫安蠻民刀  
落硬從征有功宜陞任之故有是命六年給南甸宣撫司金  
牌信符勸令加敕諭之十年免南甸所欠差發銀兩令安業  
後仍前科辦天順二年命故宣撫刀落硬子刀落蓋襲職復  
置南甸驛驛丞一人以上人爲之刀落蓋奏南寧伯毛勝騰  
衝千戶所千戶蒲愈占其招八地方寨子田畝分作莊戶辦  
納銀兩米戶等物逼民逃竄事下戶部覆奏請敕雲南三司  
官同巡按詣其地體勘所占田寨照數退還毛勝蒲愈治罪  
從之成化六年南甸宣撫遣千夫長額近怕等來朝貢馬及  
銀器方物賜賚有差仍命齎敕并綵幣歸賜其官及妻南甸  
所轄部有羅卜思莊與小隴川皆百夫長之分地知事謝氏

居曩宋悶氏居蓋西屬部直抵金沙江與迤西地相牙錯宣撫刀落寧襲兩世絕後以刀落啓繼同廖氏兼攝其地南甸地最廣司東十五里曰蠻干宣撫世居之其南百里有關木為柵周一里曰南牙甚高延袤一十餘里官道經之上右百梯蠻人所據以為險者也

茫市舊曰怒謀又曰大枯賧小枯賧在永昌西南四百里即唐史所謂茫施蠻也元中統初內附至元十三年立茫施路軍民總管府領二甸洪武十五年置茫施府正統七年總兵官沐昂奏茫市陶孟刀放革遣人來訴與叛寇思任發有讐今思任發已遠遁其思機發兄弟三人來居麓川者藍地方願擒之以獻兵部言思機發刀放革先與賊首思任發同惡

卒見勢窮乃言結毀其情請詐俱難憑信宜再降敕諭刀放革如能去逆効順則當密調土兵以助勦思機發帝從其言八年思機發令其黨消孟車等來攻茫市為官軍所敗刀放革來降靖遠伯王驥請設茫市長官司以陶孟刀放革為長官隸金齒軍民指揮使司成化八年木邦曩罕弄亂掠隴川敕茫市等長官司整兵以備調遣萬曆初長官放福與隴川岳鳳聯姻導緬寇松坡營事覺擒福誅之立舍目放福領司事轄於隴川茫市川原廣邈田土富饒而人稍脆弱云者樂甸本龍馬他郎甸猛摩之地名者烏洪武末內附隸雲南布政司永樂元年設者樂甸長官司改隸雲南都司時西平侯沐晟言其地舊屬麓川平緬而地廣人稠故有是命十

八年六月者樂甸長官刀談來朝貢馬自是皆以刀氏世領  
司事其地山險瘴多介於鎮沅元江景東間日事攻戰鎧械  
犀利兵寡而勅諸部畏憚之

茶山長官司永樂二年頒給信符金字紅牌於茶山長官司  
八年茶山長官司長官早張遣人貢馬宣德五年茶山長官  
司奏所隸蠻民悉居深山而滇灘當茶山死高之衝寇常出  
没人不能安通事段勝頗曉道里能安人心乞以勝為巡檢  
置司滇灘從之

孟連長官司永樂四年四月設時孟連頭目刀派送遣子壤  
罕來言孟連舊屬麓川平緬宣慰司後隸孟定府而孟定知  
府刀名扛亦故平緬頭目素與同儕難隸管屬乞改隸遂設

長官司隸雲南都司命刀派送為長官賜冠帶印章并賜其  
子宴正統四年麓川思任發反以兵破孟連長官司其長官  
遂降於麓川為木邦宣慰罕蓋法所征敗七年總督王驥征  
麓川招降孟連長官司亦保等寨十二月敕頒賜孟連長官  
司故土官刀派罕男派樂等及其妻綵幣俱命來使齋與之  
以麓川平故也嘉靖中孟連與孟養孟密諸部相仇殺者數  
十年司廢至萬曆十二年隴川平復設猛臉長官司  
里麻長官司永樂六年七月設隸雲南都司以刀思放為長  
官時思放為里麻招剛招剛者故西南蠻官名思放籍其所  
治之地來朝請授職事統治其民遂有是命仍賜印章冠帶  
八年里麻長官司遣頭目貢馬

鈕元長官司宣德八年九月置鈕元五隆諸寨在和泥之地時其酋任者陀比等朝貢至京皆奏地遠蠻民蕃多請設官授職以總其衆行在兵部請并五隆於鈕元設鈕元長官司從之遂以任者爲長官陀比爲副

東倘長官司宣德八年置仍隸緬甸宣慰司時緬甸宣慰昔得謀欲殺當蕩頭目新把的而奪其地新把的遣子莽只來朝貢象馬方物奏乞置司授官庶免侵殺之患從之遂置東倘長官司命新把的爲長官東倘地名也

瓦甸長官司永樂九年以隸雲南都司瓦甸初隸金齒土官刀怕賴言本司隸金齒遠而去都司近故改隸焉宣德八年置雲南曲石高松坡馬緬三巡檢司初瓦甸長官司言曲石

高松坡馬緬其地山高林茂寇盜出沒人民不安乞置巡檢司以通事楊資楊中范興爲巡檢下三司及巡按御史審勘至是皆以爲便遂置三巡檢司命資等爲巡檢資於曲石中於高松坡興於馬緬正統五年瓦甸長官司長官早貴爲思任發所獲殺其守者十七人孛家來歸帝嘉其忠順命所司褒賞以早貴爲安撫賜綵幣四表裏給受誥命

促瓦散金二長官司永樂五年設隸雲南都司初其地多屬麗川平緬宣慰使司土蠻註甸八等來朝請別設長官司從之命註甸八等爲長官各給印章

木邦舊名孟都一名孟邦元至元二十六年立木邦路軍民總管府領三甸洪武十五年平雲南改爲木邦府三十五年



七月木邦土官知府罕的法遣頭目刀孟忿等來朝貢馬及金銀器賜鈔幣九月設木邦府以土官罕的法爲木邦知府永樂元年八月遣內官楊瑄齋敕至雲南諭木邦諸土官二年木邦遣人來朝貢各賜鈔幣時麓川平緬宣慰所遣頭目刀門賴訴木邦數侵其地命西平侯諭之因改木邦府爲軍民宣慰使司以知府罕的法爲宣慰使賜誥印世襲四年七月帝以罕的法發兵助征八百用命深入攻其江下等十餘寨斬首五百餘級特遣鎮撫張伯恭經歷唐復賜之白金二百兩錦綺絲表裏及其頭目陶孟王甫白金紵絲表裏有差明年罕的法遣使來朝謝恩貢象馬犀牛方物頒賜如例復加賜其母及妻錦綺紗羅又明年故木邦宣慰使罕的法子

罕賓發來朝請襲父職命賜冠服七年七月遣使貢象馬金銀器謝襲職恩又遣刀不荅等奏緬甸宣慰使那羅塔數誘賓發背叛賓發念受國恩不敢從逆若天兵下臨誓當効命帝嘉其忠遣中官徐亮齋敕勞之賜白金三千兩錦綺三百表裏祖母母妻織金文綺紗羅各五十匹自是每三年遣使貢象馬不絕十一年八月罕賓發遣頭目刀不荅以所獲緬甸土官那羅塔象馬諸物來獻初那羅塔不遵朝命侵據孟養地罕賓發請以兵討帝許之罕賓發遣頭目刀散孟等攻破緬甸城寨二十餘處多所殺獲因獻其象馬諸物於京師宣德三年木邦故土官宣慰刀罕發從子罕門法請代襲遣中官徐亮齋敕及文綺表裏賜之并及祖母母妻有差八年

木邦與麓川緬甸各以爭地故訴於朝帝命黔國公沐晟并  
三司巡按公勘正統三年敕諭罕門法大軍臨境卽率兵會  
征五年總兵官沐昂遣人間道達之得報知其祖母美罕板  
率其孫宣慰罕蓋法陶孟刀板放等與叛寇戰於孟定孟璉  
地殺賊部長二十人斬首三萬餘級獲馬象器械甚衆帝嘉  
其功特授罕蓋法爲懷遠將軍封其祖母爲太淑人賚以金  
帶綵幣七年總督王驥奏罕蓋法陶孟刀垠送領兵攻麓川  
板罕貢章等寨破之追至孟蒙獲其孥七人象十二隻思任  
發父子僅以身免走金沙江遁孟廣帝命指揮陳儀撫勞之  
且曰木邦能自効生繫賊首獻其酬以麓川土地人民八年  
免木邦歲辦金萬四千兩木邦或遣人來朝謝恩并獻所獲

賊酋思任發家屬帝復賜敕及綵幣表裏以旌勞之十一年  
罕蓋法及緬甸宣慰卜刺浪遣陶孟刀路猛千戶王政等獻  
思任發首及諸俘馘至京并修貢職因求麓川地兵部言麓  
川已設隴川宣撫司其以孟止地給木邦因特敕諭之并遣  
官諭祭其母以表忠賢免木邦歲辦銀八錠俟三年後復輸  
納景泰元年罕蓋法奏乞隴川界者闌景線地未報可蓋法  
子罕落法陶孟思外發輒領兵據之隴川宣撫刀歪孟訴於  
總兵沐璘璘遣使至木邦戒其勿妄動命歸麓川故地而以  
底麻地與之四年命罕落法代襲父職其部族罕措法者欲  
推落法叔罕逆襲乃挾頭目刀板放等聚衆謀殺落法落法  
避於孟更地遣人赴總兵官言狀且求救璘以聞詔左參將

胡誌調兵往撫諭之誌至諭以禍福罕措法刃板放等皆懼誌傳其族衆與設盟而還然罕落法猶避居孟都凡數年不敢歸孟都蠻者近隴川宣撫司地輒遣蠻兵二百更番護之天順元年鎮守雲南右監丞羅珪奏罕落法與所部攻殺遣人求援臣等議委南寧伯毛勝都督胡誌量調官軍相機勦捕帝以蠻衆自相仇非犯邊疆止之二年罕落法奏爲思坑曩罕弄等所攘殺乞兵勦除命總兵官區處以聞六年總兵官沐瓚奏罕落法屢侵隴川地欲將原撥守貴州兵八千調回防禦兵部議毋許詔留其半成化十年黔國公沐琮等以木邦所轄蠻婦曩罕弄等侵掠隴川攻劫貢章地以聞曩罕弄者故木邦宣慰罕措法之女嫁其部長思外發地有寶井

屬焉未幾罕措法卒孫罕落法嗣曩罕弄以尊屬不樂受其節制噉族人與爭景泰中叛木邦逐宣慰據公署殺掠鄰境隴川孟養地威力日盛自稱天娘子其子思柄自稱宣慰黔國公琮奏委三司官往撫曩罕弄爲部衆所惑驕蹇不服且欲外結交陞兵威逼木邦八百諸部琮等復以聞於是兵部尚書張鵬等主用兵詔命廷臣集議皆以孟密與木邦止是挾仇爭奪竝未侵入邊境但當撫諭孟密不可輕易加兵因敕副都御史程宗起復馳傳與譯者蘇銓以往時成化之十八年也踰年孟密曩罕弄子思柄遂遣陶孟埽硬等來朝奏事貢金寶象牙諸方物賜宴并衣服綵緞等物有差仍令齎敕與綵幣報賜曩罕弄等九月孟密奏屢爲木邦所擾乞別

設安撫司事下兵部尚書張鵬以太監覃平御史程宗撫馭  
已有成緒遂命程宗巡撫雲南仍敕平偕詣金齒親召曩罕  
弄母子并木邦宣慰諭之其孟密地或仍隸木邦或別設安  
撫具奏以聞初曩罕弄竊據孟密遠貳於木邦畏鄰境諸土  
官不平或加之兵潛遣人從間道抵雲南至京獻寶石黃金  
於要路乞開設治所直隸布政司兵部爲之覆奏閣臣萬安  
欲許之而劉珣劉吉皆不謂然以孟密原木邦所轄地今曩  
罕弄叛而請命於朝若許之則凡土官聞之誰不解體既而  
吉以憂去序班蘇銓受安風旨以告於宗宗復奏曩罕弄與  
木邦仇殺已久勢難再合已撫諭諸蠻示以朝廷德意着其  
罪惡開設衙門令還其所侵土地皆踴躍奉命木邦亦已允

服矣乞遂行之部臣奏聞報可二十年六月設孟密安撫司  
隸布政司以土婦曩罕弄子思勳爲宣撫時孟密據寶井之  
利資爲結納而木邦爲孟密所侵兵力積弱不能報復雖屢  
嘗奏懇其事竟不得直云弘治二年雲南守臣奏孟密安撫  
司土婦曩罕弄先後占奪木邦地二十七處又陰誘其頭目  
放卓孟等叛木邦木邦不能立其勢必盡吞而後已乞敕八  
百宣慰司俾與木邦和好互相救援亦敕木邦宣慰收復人  
心親愛骨肉勿使孟密得以乘間誘叛自致孤弱如孟密聽  
諭方許曩罕弄孫承襲報可并敕雲南守臣親詣金齒曉諭  
以聞復降敕詰責前雲南鎮巡官所以受賂名侮啓釁者三  
年追論致仕南京工部尚書程宗罪先是木邦宣慰司頭目

思柄劫占本司地方宗以右副都御史奉朝命率序班蘇銓撫諭之銓受思柄金給宗爲之奏設孟密安撫司卽以思柄爲安撫銓復嗾思柄焚所占木邦分地孟八等十寨僞爲狀歸之木邦實未歸也思柄由是益橫至是木邦宣慰罕完法發其事時宗以尚書致仕巡按御史請追罪之獄具帝以事在軍前命從輕議六年雲南守臣奏孟密侵奪木邦兵連禍結垂四十餘年屢撫屢叛勢愈猖肆請調兵討之事下兵部議以孟密安撫初隸布政司今改隸木邦政令不一以致爭殺或仍如初隸可息兵從之初孟密思拱之復叛木邦也因其宣慰使罕完法親往孟乃寨納婦乘虛襲之竊據木邦分地二十七處誘降其頭目高荅落等又爲思揲聚兵阻路罕

完法不得還依孟乃寨者三年於是巡撫雲南張誥等會奏議遣都指揮僉事劉鏞參政毛科等詣孟密撫諭思揲猶不服復遣參政方守僉事周鳳署都指揮僉事馬炫督理糧餉參議黃東山副使趙炯都指揮僉事實俊等督率隴川南甸于崖三宣撫司積糧開路示以必征之勢又令漢土官舍耀兵以威之高荅落等聞之懼復歸罕完法思揲欲殺之罕完法令人調其土兵合隴川等三宣撫蠻兵至蠻遮寨共圖之思揲懼乃罷兵木邦人遂從孟乃寨迎罕完法以歸至是誥等奏其事且言賞有功者兵部議罕完法雖還木邦思揲猶未悔罪必須思揲出見令與罕完法敵血同盟歸地獻叛自願承襲不啓爭端乃可論功行賞報聞九年罕完法及孟密

安撫司土舍思揲各遣陶孟來貢報賜如例初思揲之攻圍蠻遮也木邦宣慰妻求救於孟養思陸思陸者麓川反寇遺孽約非總兵軍符徵發不許過江至是自請効力勦捕思揲而蠻俗相傳孟密素畏思陸之兵因請於鎮巡許之孟養軍未至思揲聞之已解去未幾思揲復構難於是總兵官沐琮遂檄孟養會計尋孟密聽撫與木邦講解孟養思陸既渡江遂留蠻莫不肯退木邦與思陸比謀共取孟密於是滇方之患又在孟養矣時木邦孟密構難自萬安程宗勣處失宜諸酋長紛紜進退中國用兵且數十年嘉靖初思陸子思倫與木邦宣慰罕烈同擊殺緬酋莽紀歲而分其地後莽瑞體強將修怨木邦隆慶二年木邦土舍罕拔告襲有司索賂不爲

請拔怒與弟罕章集兵梗往來道商旅不前而已食鹽亦乏絕乞於緬緬以五千簋餽之拔自是反德緬攜金寶象馬謝之瑞體亦厚報荅之歡甚約爲父子甘心爲用久之瑞體死子應裏入岳鳳言誘拔殺之時萬曆之十一年也拔子進忠守木邦應裏遣弟應龍代之其孽子罕鳳與耿馬舍人罕皮欲擒進忠獻應龍進忠攜妻子內奔虔等追至姚關焚順寧而去十二年官軍破緬於姚關立其子欽欽死其叔罕禔約暹羅攻緬緬恨之三十四年緬以三十萬衆圍其城請救於內地不至城陷罕禔被擄緬僞立孟密思禮領其衆事聞黜總兵陳賓然木邦遂亾孟密自思揲授安撫傳子思直襲直年至百十歲嘉靖中思烈襲其子思奔思混爭立緬人爲混

殺奔混遂以地附緬改名忠萬曆十二年忠率思化思恨丙  
測齋偽印來歸遂陞爲宣撫已忠復投緬乃以其母罕烘代  
領司印居孟密緬攻孟密罕烘率其子思禮從子思仁奔孟  
廣而孟密遂失十八年緬復攻孟廣罕烘思禮奔隴川思仁  
丙測奔工回而孟廣又失先是思仁隨罕烘奔孟廣時有甘  
線姑者思忠妻也思仁乘思忠投緬時蒸嫂線姑卽欲妻之  
而罕烘不許至是罕烘與線姑及線姑子思永皆奔隴川而  
思仁奔雅蓋率兵象犯隴川欲擄線姑去會隴川有備弗克  
逞乃同丙測歸緬緬僞署思仁於孟密食其地於是罕烘思  
禮復奔苾市初孟密寶井朝廷每以嬖臣出鎮司採辦武宗  
朝錢能最橫至嘉靖隆慶時猶然嘉靖九年有旨採辦時思

直猶在巡按奏以啓戎心不聽萬曆二十年巡撫陳川賓言  
緬阿瓦擁眾直犯蠻莫其執詞以奉開採使命令殺思止以  
開道路全滇之禍皆自開採啓之時稅使楊榮縱其下吳顯  
忠以開採爲名恣橫暴蠻人苦之且欲令麗江退地聽採緬  
酋因得執詞深入巡按宋興祖極言其害請追還榮等帝皆  
不納也凡採辦必先輸官然後與商賈貿易每往五六百人  
其屬有地羊賽在孟密東往來道所必經人工幻術採辦人  
有強索其飲食者多腹痛死已所乘馬亦斃剖之則馬腹皆  
木石也思直嘗勦之殺數千人不得絕至是復議勦以兵少  
中止

孟養蠻名迤水有香柏城元至元中於孟養置雲遠路軍民

總管府洪武十五年平雲南改爲雲遠府其地故屬平緬宣慰司主之雖內屬未嘗分職也及平緬思倫發爲其下所逐走京師帝命西平侯沐春以兵納之還故地三十五年分元所置雲遠路爲孟養府以土官刀木旦爲孟養知府永樂元年刀木旦遣姪刀滿賽等來朝貢方物及金銀器賜絨錦金織文綺表裏如例二年改孟養府爲軍民宣慰使司以刀木旦爲宣慰使賜之誥印俾子孫世襲四年刀木旦與夏里相仇殺而緬甸宣慰那羅塔乘釁發兵劫之殺刀木旦及其長子思樂發掠其人口牛馬遂據其地事聞詔行人張洪等齎敕諭責之那羅塔懼遂歸其境地九年以刀木養爲孟養宣慰使賜宴遣還十一年木邦宣慰使罕賓法以那羅塔侵據

孟養地請自率兵討帝許之破緬甸城寨二十餘并獲其象馬悉獻京師十四年復設孟養軍民宣慰使司命故土官刀木旦次子刀得孟爲宣慰使初刀木旦及其長子思樂發爲緬甸那羅塔所殺司遂廢孟養之人從木旦之姪玉賓散居干崖金沙江諸處者三千餘人朝廷嘗命玉賓署宣慰使以撫之至是復設宣慰司授刀得孟宣慰使改授玉賓爲本司同知令率其衆復業仍遣使諭那羅塔各守疆土毋侵擾十五年刀得孟遣使貢馬方物賜鈔五十錠綵幣五十匹宣德五年刀木賓奏伯父刀木旦原任宣慰使爲土官刀木浪所殺據有其地後蒙朝廷遣官訪求玉賓授以同知又阻於緬甸土官不得已寄居金齒二十餘年今孟養地又爲麓川宣



慰思任發所據乞遣兵送歸本土以圖報効帝命黔國公沐  
晟遣還之八年復立孟養宣慰司以故宣慰刀木旦子刀孟  
塗爲宣慰及同知刀玉賓同撫軍民如舊貢賦然是時孟養  
宣慰雖立其地總爲思任發所據及思任發敗奔緬甸其子  
思機發潛匿孟養求撫復據麓川朝廷嘗遣敕諭孟養宣慰  
能擒除思任發父子還爾故地且膺厚賞時宣慰新立勢孤  
未能也十三年又敕孟養宣慰司大小頭目令其勸諭伴送  
思機發來朝許以陞賞思機發疑畏竟不至蓋孟養之人陰  
與之表裏云於是帝以孟養宣慰大頭目刀變蠻等隱藏思  
機發敕數其罪論之曰孟養乃本朝開設衙門爾刀變蠻等  
敢拒違朝命一可伐思機發係賊子爾等故縱不捕二可伐

爾孟養昔被思任發侵奪其地遂爾宣慰刀孟賓見在雲南  
優養爾等與仇爲黨三可伐雲南總兵官世世管屬爾地茲  
奉命接取賊子爾等不從調度四可伐爾等不過以爲山川  
道路險阻官軍未易遽到又以爲氣候瘴癘炎熱官軍不可  
久居勢強則拒敵力弱則奔遁殊不知昔馬援遠標銅柱險  
阻無傷諸葛亮五月渡瀘炎熱無害皆能破滅蠻衆開拓境  
土況今大將有必勝之機麓川之師可爲前鑒爾等速宜悔  
過自圖令思機發親自前來仍與一官一地令享生全如不  
肯出爾等卽捕擒爲上策拒思機發報與官軍接取爲中策  
若代彼支吾令其逃匿則并爾等勦滅悔無及矣時已三征  
麓川內旨必欲生擒賊渠思機發已密諭總督王驥矣又敕

論以雲南安置孟養舊宣慰乃孟賓爲嚮導及兵出窮征思  
機發卒遁去不可得於是乃以孟養地先給緬甸宣慰馬哈  
省管治命捕思機發時正統之十四年也景泰二年思機發  
之子思卜發遣使來貢求管孟養舊地廷臣議孟養地已與  
緬甸豈可移易而思卜發展轉觀望亦難允其所請時朝命  
雖不之許然思卜發已潛據之卽緬甸不能奪而有也思卜  
發死子思洪發嗣自天順成化每朝貢輒署孟養地方儼然  
自有其地矣成化七年緬甸申與地之請廷議以思洪發所  
掌謝之十二年緬甸宣慰奏以孟養貢章酬功之旨出於前  
朝今不予地思洪發反奪之扼其朝貢駐泊之所乞仍歸緬  
帝命傳諭思洪發以朝貢往來通道不得阻遏并敕緬使勿

多望生事十八年孟養金沙江思陸發遣人來朝貢象馬賜  
宴幣如例二十三年思陸發復遣人來朝貢賜資如前思陸  
者故麓川叛寇思任發之遺孽也靖遠伯王驥南征時知陸  
未可遽滅與之約誓非總兵官軍符徵發不許過江時思洪  
發雖假息孟養勢已微獨思陸漸盛成化中太監錢能鎮雲  
南思陸數以珍物遺能因得入貢稱孟養金沙江思陸發不  
係銜比思洪發故事常窺立功以襲祖職適木邦宣慰罕完  
法納婦孟乃爲部下信蠻所遮不得歸孟密安撫土舍思揲  
因侵據木邦地爭殺累年未決雲南守臣議征思陸乃自請  
効力勦捕思揲時蠻衆相傳孟密素畏思陸兵參政毛科以  
爲然請於總兵鎮巡官許之時思揲方圍蠻遮急木邦宣慰

妻亦求救於思陸兵未至思揲聞解去巡撫張誥議發思陸兵令戮力捕思揲且令藺昂促之發兵思陸乃遣大陶孟倫索領蠻兵象馬過江倫索旣過江指鷹謂藺昂曰我曹猶此鷹奪得土地卽管食之耳科聞之憂甚時思揲起兵令陶孟思英等守蠻莫孟養兵亦營於蠻莫寨思英堅守不出已而請和孟養兵聞思英約降也頗有怨言官軍糧絕遽引還倫索亦恐思英絕其歸路取道于崖而還科念倫索前語急戒令孟養還兵守疆界孟養不聽自是遂犯約數興兵渡江與孟密戰弘治十二年雲南巡按謝朝宣奏孟養思陸本麓川叛種竄居金沙江外成化中嘗據緬甸之聽蓋弘治七年徵調其兵渡江遂復據騰衝之蠻莫又率木邦起兵攻燒孟密

安撫司殺掠蠻民二千餘人劫象馬金寶有併吞孟密覬覦故土之志迤西人恭們騰衝人段和爲之謀主屢撫不聽雲南會城去孟養遠聲勢難接曩於金騰處添設鎮守太監爲撫蠻安民之計而近時太監吉慶貪暴無狀屢激變故雖嘗陽却思陸之贊然蠻知其貪而餽之又烏知其不因其却而更進之臣聞蠻莫等處乃水陸會通之地蠻方器用咸自此出貨利之盛非他方比以故思陸屢撫不退況邇年來透漏邊情不止恭們段和而已又有江西雲南大理遁逃之民多赴之而雲南差官每多齎違禁物往彼餽送漏我虛實爲彼腹心鎮夷關一巡檢耳官小職微安能禁制臣愚計之孟養甲兵不能當中原一大縣以雲南之勢臨之易於壓卵奈何

一調卽來屢撫不退皆鎮巡失之於初逋逃奸人謀之於中撫蠻中官壞之於後伏望垂念邊民困苦將雲南鎮守太監止存一員取回一員別用指揮一員守備鎮夷關驅思陸退歸江外面移騰衝司於蠻莫并木邦孟密不得窺伺乃爲萬全之策設思陸冥頑不聽撫諭便當決於用兵使無噍類以爲土官不法之戒先是慶已爲思陸請朝貢至是因朝宣疏并下鎮巡官議勦撫之宜以聞數年不決十六年巡撫陳金乃遣金騰參將盧和同參議郭緒副使曹玉撫諭孟養思陸和先至騰衝孟養遣陶孟來投緇書致方物和諭以禍福使歸語思陸掣兵過江歸所出蠻莫等地且調隴川干崖南甸三宣撫司蠻兵及戰象借官軍分道至金沙江思陸乃遣大

陶孟倫索怕卓等率所部來見和等再申諭之思陸聽命退還前所據蠻莫等地十三處撤回象馬蠻兵過金沙江而歸又遣陶孟招剛等貢象六隻銀六百兩并金銀酒器金鞍金鈎象牙土錦孔雀尾等方物納款鎮巡官以聞因言蠻莫等地原隸木邦成化間始爲孟密所有至弘治十年爲思陸所據連年構禍今始平定其地既不可復與木邦孟密又不可割畀隴川干崖南甸三宣撫宜暫於騰衝歲檄官軍四百分番守之其思陸前有助平思揆功今悔禍納款請賜以名目冠帶仍降敕獎諭之部議以蠻莫等處木水邦分地在大義宜歸之木邦其名目冠帶貢使已言思陸不願受不宜輕畀請敕厚勞遣歸之報可時思陸覲得宣慰司印部執不予於

是數出兵與木邦孟密相仇殺無寧歲嘉靖七年總兵官沐  
紹勛巡撫歐陽重遣參政王汝舟知府嚴時泰等徧歷諸蠻  
諭以禍福孟養思倫等各願貢象牙土錦金銀器退地贖罪  
乃以蠻莫等十三處地方土地寬廣諸蠻歷年所爭屬之騰  
衝司檄軍輪守則煙瘴可虞屬之木邦則地勢遼遠蠻心不  
順莫若仍屬孟密管領歲徵差發銀一千兩而割孟乃等七  
處仍歸木邦罕烈則分願均而忿爭息矣報可先是思陸死  
子思倫糾木邦與孟密擊殺緬甸宣慰莽紀歲而分據其地  
及紀歲之子瑞體長欲報父仇而復故地時攻掠孟養與思  
箇爲難萬曆五年雲南巡按陳文燧言孟養思箇與緬世仇  
今更歸順於緬因引弘治朝先臣劉健嘗議孟養事狀謂思

陸有官猶可制卽無官其僭自若也不如因而官之以抗緬  
報可十一年緬爲游擊劉縝所敗孟養思威亦殺緬使降於  
縝十三年隴川平乃於孟養立長官司而酋思眞已爲緬擄  
其部衆思遠奉思眞妻來歸給以冠帶令思遠佐其妻守孟  
養思遠乘亂自立爲宣慰貢象進方物暴虐諸部諸部引緬  
兵至聲言還思眞思遠奔盞西有思轟者內附於蠻莫思正  
其據險抗緬三十年緬追思正轟率兵倍道馳救至則正已  
被殺三十二年緬攻入迤西轟走死緬以頭目思華據之華  
死妻怕氏領其衆緬中他日更番戍守連年發兵從行甚苦  
之曰孟養不亾蠻何得至此旣轟之遺種曰放思祖有衆千  
餘不敢歸寄食于崖云舊制宣慰遣人俱稱頭目惟木邦及

緬甸又有陶孟及招剛等稱孟養司又有招八稱皆見於奏章因其俗不改

車里卽古產里爲倭泥貂獫諸蠻雜居之地古不通中國元世祖命將兀良吉解伐交趾經所部降之置撒里路軍民總管府領六甸後又置耿東路耿管孟弄二州洪武十五年定雲南蠻長刀坎來降改置車里軍民府以坎爲知府三月坎遣姪豐祿來貢方物詔賜豐祿衣一襲鈔十錠尋又賜坎及豐祿織金文綺九匹帛如之鈔八十衣五十事以其初奉貢來朝故也十七年七月遣其子刀思拂來貢賜坎冠帶鈔幣八月改車里軍民府爲車里軍民宣慰使司以坎爲宣慰使二十四年子刀暹答嗣遣弟刀三怕刺來貢象及方物二十

八年刀暹答以賜誥命遣其弟刀吾等謝恩朝貢子賜如例永樂元年九月刀暹答命其下剽掠威遠獲其知州刀算黨及民人以歸西平侯沐晟奏聞請發兵討帝命晟移文諭之如不悛卽以兵繼又以車里已納威遠印信是悔過之心已萌不必加兵晟使至暹答果懼還刀算黨及威遠之地遣弟刀臘貢馬謝罪都御史陳瑛奏宜下刀臘法司并逮問刀暹答庶示懲帝以其能改過宥之二年七月暹答復遣子刀魯來貢方物命賜暹答誥命冠帶綺帛如例八月遣內官楊瑄齎敕撫諭車里等土官道經八百大甸爲宣慰刀招散所阻弗克進三年七月刀暹答遣土目攬線思奏請舉兵攻八百大甸帝嘉其忠義但以招散幼弱慮爲奸邪孟乃朋孟允公

等所播弄遽爾加兵恐虐無辜特遣司賓田茂推官林禎齋  
救同車里人往諭命出諸奸免其罪且敕晟諭車里而刀招  
散仍桀驁自如十二月命晟率師及車里木邦諸宣慰兵至  
八百境破其猛利石崖及者答二寨木邦又破其江下等十  
餘寨八百恐遣人詣軍門伏罪晟駐兵以八百所陳詞奏聞  
詔宥之敕車里等班師益嘉刀邏答忠四年元江軍民遣人  
餽運軍儲抵車里境悉爲守者阻遏時刀邏答征八百未與  
其事然懼爲元江所構遣其子刀典名入國學實自質冀朝  
廷不疑帝知其隱賜典衣服鈔幣慰諭之遣還五月帝以雲  
南道里遼遠諭車里等三年一貢著爲令邏答遣姪刀鵠男  
刀者板等貢方物帝念其從征有勞遣使齋救褒諭賜白金

百五十兩錦二疋羅八并賜其土目攬線思等表裏有差又  
以紵絲羅各九匹賜其妻十一年十一月帝遣中官洪仔生  
齋救往賜刀邏答至而邏答卒長子刀更孟自立驕很失民  
心未幾亦卒更孟長子霸羨應襲以年幼衆推刀賽署司事  
刀賽者更孟弟刀怕漢也怕漢死妻以前夫子刀弄冒爲邏  
答孫請襲十五年二月命刀弄襲車里宣慰使以更孟從弟  
刀雙孟爲本司同知十九年正月雙孟言刀弄屢以兵侵劫  
蠻民不得寧處乞別設治所公撫其衆詔割其地置靖安宣  
慰使司陞雙孟爲宣慰使命禮部鑄印給之宣德三年十二  
月雲南布政司奏刀弄與族叔靖安宣慰刀雙孟相仇殺弄  
棄地投老撾請差官招撫帝命黔國公計議以聞六年五月

黔國公復奏謂奉命招撫乃弄其母具言布政司承差劉亨來徵差發金已爲亨取既本司復來徵乃知爲亨所誑乃弄復徵於蠻民因激變逐弄弄逃入老撾尋還境內以死未嘗棄地投順亦未嘗與刀雙孟仇殺且雙孟已死子霸供又襲矣已往事求寬釋以聞帝命法司執劉亨等罪之七年九月車里土舍刀霸羨遣頭目召哀人貢請襲從之遣行人陸垣齋收賜冠帶襲衣九年十月靖安宣慰刀霸供言靖安卽車里舊地今析爲二致下人屢有爭端乞仍并爲一歲貢如例帝從其請革靖安宣慰仍車里軍民宣慰司命刀霸供刀霸羨共爲宣慰使俾上所授靖安宣慰司印正統五年十月命齋敕并綺幣賜刀霸羨及妻嘉其勤修職貢也六年二月麓

川宣慰思倫發叛詔給車里等各長官信符金牌命合兵勦賊景泰三年五月以刀霸羨屢調兵有功免其從前累欠差發金天順元年二月總兵官沐璘奏刀霸羨自殺弟板雅忠等已推兄三寶歷代承職今板雅忠又作亂糾合八百相仇殺欲調軍撫勦值春暖瘴高未宜動衆帝命璘亟宜撫諭并勘應襲者奏聞二年六月三司官奏三寶歷代者亦刀更孟子母金氏以更孟死改適今欲以三寶歷代繼霸羨此板雅忠所以構兵也帝以三寶歷代乃庶孽奪嫡謀害刀霸羨以致板雅忠借兵攻殺宜不當襲但蠻民皆推立之姑從衆願命襲宣慰使成化十六年交趾黎灝率衆侵掠且頌僞敕於車里期會兵共攻八百車里持兩端雲南守臣以聞特遣使



敕車里諸土官互保障勿懷二心二十年以兵部尚書張鵬奏復敕車里等慎固封疆防交人入寇不得輕與文移啓鑿納侮嘉靖十一年緬賊莽應裏據擺古蠶食諸蠻諸土司多被脅爲莽嚮導時車里宣慰刀糯猛亦折而入緬有大小車里之稱以大車里應緬而以小車里應漢萬曆十三年命元江土舍那恕往招糯猛復來歸獻馴象金屏象齒諸物謝罪詔受之聽襲職天啓七年四月巡撫閔洪學奏緬酋召霸浪烏罕者舉兵侵孟艮府就車里求助宣慰刀糯猛遣兵萬人象十隻往援之比向車里報復糯猛年已衰邁急欲求解且重賂修和緬聞糯猛男名河璇有女名召烏岡色美責獻烏岡河璇別以女給之緬知其假大憤攻車里愈急糯猛父

子不能支遁至思毛地緬以嚮導二人星馳尾之獲糯猛并河璇械還請改與師問罪時中朝未及議加兵車里遂殄云老撾俗呼爲撾家古不通中國洪武三十五年九月老撾土官刀線歹備方物入貢始置老撾軍民宣慰使司永樂二年四月以刀線歹爲宣慰使命禮部鑄印給之五年九月刀線歹遣頭目來朝貢金銀器皿方物賜鈔幣有差十月帝以刀線歹潛通安南李聲遣使詰責論其悔過六年十月刀線歹遣人來朝貢象馬方物予賜如例七年五月刀線歹遣頭目板懶等進金銀器皿象方物來謝罪願修職貢不敢悖許之自是連年遣人入貢賚予如例復命禮部遣中官楊琳往賜以絨錦金織文綺等物十年十月來貢命禮部加賜焉宣德

六年五月遣使齎敕獎諭宣慰刀線達并賜綵幣表裏九年  
宣慰刀攬掌遣頭目混淪來朝貢馬及金銀器皿賜予遣還  
道中多爲他部所阻至是乃救孟良車里諸部土官各遣人  
護之而先是總兵官沐晟遣人送混淪等至其境聞老撾率  
國人與八百國仇殺晟請給信符護送至是復來朝仍命給  
之景泰元年命故宣慰刀線歹子板雅者襲職五月板雅者  
遣頭目雷內等貢象馬方物循例子賜雷內又請賜土官衣  
服故事無加賜衣服者詔加土官錦二紵絲紗羅各四并賜  
其妻紵絲羅各三成化元年給金牌信符於老撾七年鑄給  
老撾軍民宣慰使司印以皆爲賊焚燬也十六年宣慰遣使  
來朝賚予如例時老撾被交趾所攻鎮守內官錢能以聞因

救老撾使兼程回并量給道里費十七年安南黎瀨率蠻兵  
九萬開山爲三道進兵破哀牢繼進老撾地殺宣慰刀板雅  
蘭掌父子三人其季子怕雅賽歸依八百宣慰刀攬那遣兵  
送往景坎黔國公沐琮以聞命怕雅賽襲父職免其貢物一  
年賜冠帶綵幣以示優恤既怕雅賽欲報安南之仇覲中國  
發兵爲助帝以老撾交趾皆服屬中國久恤災解難中國體  
也令琮慎遣人諭之弘治十一年宣慰舍人招攬章應襲宣  
慰使遣頭目刀乃等來貢因請給賜冠帶及金牌信符命賚  
賞如例其金牌信符待襲職後鎮巡官保勘至日給之十一  
月招攬章遣使入貢吏部因言招攬章本係舍人未授職僭  
稱宣慰使雲南三司官冒奏違錯俱宜治罪帝悉宥之嘉靖

九年招攬章言有交趾應襲長子光緒為叔所逐出叻老撾欲調象馬送回守臣言據招攬章之言懼納叻之罪且假我為制服之資留之啓釁遣之招兵宜聽光緒自歸并責其私納光緒之罪報可二十四年雲南巡撫汪文盛言老撾宣慰土舍怕雅一聞征討安南首先思奮且其地廣兵多彼國畏之可獨當一面八百車里與老撾相近孟艮在老撾上流皆多兵象可備征討請免其察勘就令承襲印駐兵本州以備征調詔可四十年老撾宣慰司土舍怕雅遣人貢象及龍涎香給賞如例四十四年土舍怕雅攬章遣人進舞牌牙象二母象三犀角十雲南守臣以聞禮部以非貢期無漢緬公文第來路險遠跋涉踰年宜受其所貢給賞遣之無令赴京

報可時緬賊勢方張翦除諸部老撾遂折而入緬符印俱失萬曆二十六年緬敗老撾來歸奉職貢請頒印遂復鑄老撾軍民宣慰使司印給之四十年老撾宣慰遣頭日光倫等齎貢方物以印信燬於火復請再給撫鎮官以聞許之四十一年鑄印給老撾時宣慰猶進貢象隻銀器緬席賜予亦如例自是遂不復至云其俗與本邦同其部長不知姓有三等一日招木弄一日招木牛一日招木化而為宣慰者招木弄也代存一子絕不育其地東至水尾南至交趾西至八百北至車里西北六十八程至雲南布政司

八百世傳其部長有妻八百各領一寨因名八百媳婦元初征之道路不通而還後遣使招附元統初置八百等處宣慰

司洪武二十一年八百媳婦國遣人入朝貢二十四年八百  
宣慰使司土官刀板冕遣使貢象及方物先是西平侯沐英  
遣雲南左衛百戶楊完者往八百招撫之至是來貢帝諭兵  
部試尚書茹瑞曰聞八百與百夷構兵相仇殺無寧歲朕念  
八百宣慰遠在萬里外能修職奉貢深見至誠今與百夷構  
兵當有以處之可諭意八百練兵固禦俟王師進討二十七  
年五月刀板冕遣其叔父刀板直貢象牙席香等物賜板直  
等三十六人鈔羅綺布有差二十八年十一月刀板冕遣其  
下招板阿祿曠等貢紅白西洋布弔賣壁衣手巾翦絨單及  
象牙白檀香等詔賜其使綺鈔三十五年九月土官刀板直  
來朝貢方物賜如例永樂二年五月土酋刀招你遣頭目廣

暖等來朝貢方物於是設八百者乃八百大甸二軍民宣慰  
使司以土官刀招你為八百者乃宣慰使其弟刀招散為八  
百大甸宣慰使遣員外郎左洋往賜詔印冠帶襲衣是月刀  
招散遣人來朝貢馬及方物賜予如例命五年一朝貢七月  
遣內官楊瑄齋救往諭孟定孟養等府道經八百大甸為土  
官刀招散所阻弗克進三年七月遣使諭刀招散曰朕特頒  
金字紅牌敕諭與諸邊為信以禁戢邊吏生事擾害用福爾  
眾於無窮其車里老撾木邦孟養諸宣慰孟定威遠等府州  
皆敬恭聽命無所違禮惟爾年幼無知惑於小人孟乃朋孟  
允公等教誘啓釁生禍聞使臣至境拒却不納爾之罪辜不  
可悉數廷臣咸請興師問罪朕念八百之人豈皆為惡兵戈

所至必及無辜有所不忍茲特遣司賓田茂雅官林禎齋敕往諭爾能改過自新卽將奸邪之人擒送至京庶幾境土可保人民獲安其或昏迷不悛發兵討罪孽戮不貸并敕西平侯沐晟嚴兵以待如悔罪輸誠卽止兵勿進其以馬軍六百步軍一千四百護內官楊安郁斌前往又慮老撾乘車里空虛或發兵掩襲其後或與八百爲援可遣其部長率兵一萬五千往備三年十月刀招你等遣頭目乃三哈抄等奉金縷表文貢金結絲帽及方物賜鈔文綺有差十二月西平侯沐晟奏奉命率師及車里諸宣慰兵至八百境內破其猛利石厓及者荅二寨又至整線寨木邦兵破其江下等十餘寨八百恐遣人詣軍門陳辭伏罪臣等恪遵敕旨駐兵不進其車

里等宣慰亦候朝命方取班師乃以八百所陳詞奏聞因遣使敕諭車里木邦等土官曰曩者八百不恭朝命爾等請舉兵誅嘉爾忠誠已從所請今得西平侯奏言八百已伏罪納款夫有罪能悔宜赦宥之敕至其悉止兵勿進遂救晟班師四年七月敕諭刀招散繼今改心易慮毋懷誦詐以蹈前愆八月刀招散遣頭目板賽蘇等貢方物謝罪帝以不誠却之五年正月刀招散復遣頭目招板禿魯油等至貢方物及金銀器自陳以前却其貢獻至是復來謝罪命禮部受之六年八百所轄孟掌浪諸寨初平其頭目闕刀遣陶孟刀永弄等詣闕貢金銀器及馬犀牛謝罪賜之鈔紵紗羅十一月刀招散遣頭目板高等奉金縷表文貢象及金銀器等物賜予如

例七年八月復遣頭目來貢命禮部賜予如例洪熙元年三月遣內官洪仔生齋敕往賜刀招散宣德七年十月遣人來貢因奏波勒常以土酋土雅之兵來寇殺人掠財乞發兵討之帝以八百大甸去雲南五千餘里波勒土雅皆未嘗歸化勞中國爲遠蠻役非計止降敕慰諭而已正統五年遣頭目刀招三板浩等來朝貢象馬及金銀器皿象牙犀角諸方物賜宴齋刀招三板浩因奏邇年進貢方物本土民不識禮法不通漢語乞依永樂年間例仍令通事齋捧敕諭金牌信符依時催督進貢驛路令軍卒護送庶無失所從之十年給八百大甸宣慰司金牌印信符各一以前給牌符被暹羅國寇兵焚燬也成化十六年八百宣慰遣頭目來朝貢十七年安

南黎瀨已破老撾頒僞敕於車里期會兵攻八百其兵有暴死者數千傳言以爲雷所震八百因遣兵扼其歸路襲殺萬餘交人敗還土官刀攬那以報黔國公沐琮奏攬那能保障生民擊敗交賊救護老撾交人嘗以僞救脅誘八百八百毀敕以象蹴之請賜頒賞以旌忠義奏至帝命雲南布政司給官銀百兩綵幣四表裏以獎之二十年刀攬那遣人入貢雲南守臣言交兵雖退宜令八百諸部飭兵爲備弘治二年八百大甸故宣慰使刀攬那孫刀整賴貢方物求襲祖職兵部言八百遠離雲南瘴毒之地宜免勘予襲從之仍給冠帶賜予如例正德八年八百大甸刀整賴遣頭目貢象馬賜賚之其地東至車里南至波勒西至大古喇與緬鄰北至孟良自

姚闕東南行五十程始至平川數千里有南格刺山下有河  
南屬八百北屬車里好佛惡殺每村必有寺有塔以萬計有  
見侵乃舉兵得仇即已名慈悲國嘉靖間爲緬所兼并避居  
景線一名小八百自是朝貢遂不至緬以弟莽應龍居景邁  
城倚爲右臂焉萬曆十五年八百大甸上書請恢復不許初  
四譯館通事僅譯外國惟緬甸八百如之蓋司於六屬  
加重焉

明史彙

列傳第一百八十九終

